

香雪齋詩鈔



光緒十九年  
桐谿巖氏珮版

香雲齋詩  
鈔甲卷

歸安凌霞題





敘

迪周與譽同家制又同時遊長安顧不相識同治庚午  
迪周試令粵西譽亦由黃門外擢左江兵備始相見於  
桂林猶未知其能詩也間為譽視述家世知為縉生太  
史從弟縉生博學負奇有盛名譽友錢湘吟少司寇極推  
之并為譽言縉生兄弟俱不凡鄉里有八龍之目譽偶  
憶湘吟語因索觀所為文適迪周奉檄權左州牧譽亦  
之官邕管先後怱怱倣衰遂不果辛未六月迪周以公  
事至南甯談讌旬日投契益密復索近作則以叢稿塗  
乙漫漶方命小史寫本以應求者為答是冬迪周為長

香雪齋詩鈔

序

一

書寄譽備列所屬各土司風土之僻物產之詭山水之  
奇纚纚千言文至奇麗別紙附銅鼓詩二篇譽深異之  
珍弄篋衍中越歲壬申譽受代返桂林嗣後遂絕不相  
聞矣今年迪周罷任詣會城至邕而病病十餘日遽不  
起仲冬戊午長君鳧鄉茂才謁譽於書局將迪周遺命  
捧詩集見示受而讀之反袂嗚咽不能已已嗟乎以迪  
周之才使之躋華要直禁近黼黻承平上追賡歌喜  
起之盛出而膺衡鑒之任振拔孤寒提倡風雅視其鄉  
初白竹垞檜門香樹諸先生亦何多讓顧乃才不偶命  
僅以拔萃一科起趨風塵困於州縣之職抑可悲矣投



之炎荒置之窮徼憂患傷其心瘴癘毒其體羈旅憔悴  
遽天天年并區區五斗之富百里之貴天若固靳之不  
使終享嗚呼何其酷也迪周與譽交不深故未嘗悉譽  
生平亦未嘗知譽之愛重痛惜至於如此宇宙雖大生  
才實難迪周之詩雖未知於古作者何如就其姿力之  
所造亦可謂能於其事者矣阨於中壽未抵大成人不  
可以無年諒哉長君英英玉立臺閣之器迪周處為貞  
士出為循吏雖生事寥落然善人有後譽今日得見長  
君益信食報之理不誣不覺破涕香雪集四卷長君好  
藏之歸呈緇生太史點定此必傳之業勿令他手妄意

香雪齋詩鈔

序

二

刪存致失旨趣譽宦况窮薄閒居日久不能有所飲贈  
刊布有日幸郵書報譽當捍擋白金四十兩寄助剗刷  
之費譽知迪周最深而所以待之者綦薄後死之責止  
於如斯其何以慰迪周於地下也悲夫初擬賦詩數章  
拉雜摧傷思苦不屬援筆書此聊寫哀悰語雖不文鄙  
懷略盡於此夜窗雪霽寒燭幢幢清泪緣纓漬毫俱凍  
長吟累唏之聲與風際哀猿雲中斷雁同此悽斷緇生  
見之何以為情耶噫

同治癸酉十一月望前二日祥符周星譽拜識於桂林  
書局之八還堂



敘

唐時科目用通榜取才之法上不憑一人之耳目下不憑一日之短長故得人稱盛 本朝取士惟優拔兩途略仿其制而鄉會兩試皆聚天下之人試之一日而決得失於一二人之目宜其僥倖之多也吾同祖弟迪周生有異姿讀書能見大義不屑為句讀之學帖括一道不習而能未冠游庠旋食廩餼遂肆力於詩古文詞才名播遠近視取科第如拾芥與同里詞人角勝騷壇往往驚其長老每逢學使者按臨輒以古學見賞高列前茅然鄉試竟屢薦不售直至同治乙丑粵寇蕩平後黍

香雪齋詩鈔

序

一

興吳和甫少宰來視浙學補行歲科試三屆連試十一場而君十冠其曹且以鴛鴦湖權歌怪道鴛鴦飛不返湖濱猶有戰場花生涯祇合謀菱芡多少東南未種田兩聯為少宰所擊節傳示八學校官由是詩名益復大震遂登拔萃科貢於 廷越歲戊辰補應 廷試亦列優等引對後奉 旨以縣令發粵西而實非君志也

余自癸亥乞假南旋至乙丑始與君相見正值試事息忙未及談詩也及戊辰君自京歸里始以香雪齋集見示余粗閱一過題兩詩而歸之以為膠庠才士必有數卷詩示不專工帖括君亦猶夫人耳乃君旋之官桂林



聽鼓四年得一權左州牧適當瘴癘之地君體本羸因是得疾任滿歸閭遽卒於途凡在親知無不痛惜其長子震扶君喪以歸復以此稿見示則為君手定之本宦稿具在而平日酬應不經意之作刪汰殆盡故所存僅此四卷因得見庚戌前輩左江觀察叔芸周公之序係震姪奉君遺命請序者非特於君詩傾倒萬分至以吾鄉先輩初白竹垞檜門香樹諸先生相期而惜其既不得甲乙科以備承明之選復并此五斗之富百里之貴亦復靳之謂造物忌才之酷為之代鳴不平幾於痛哭流涕而道之閱之可為墮淚然余終以塵事雜沓但訝

香雪齋詩鈔

序

二

周公推許之過當而於君詩之底蘊仍未及窺也至於今忽忽二十年矣今歲夏日余方養疴吳下震姪乃抱其先集來謁再拜以請謂久欲刻以壽世而遷延不遂者自為孤露餘生惟恃館穀餬口竟不能顧及此事雖屢戰名場先舉優行後中副車總不能扶搖直上以副先人之望而得首啗一盤亦在鄉僻小縣但供朝夕而已遂致此事久擱時時隱痛於心今幸以辦賑得保郡秩筮仕來吳得司漕務俸入有餘再不急謀付梓其何以仰對先人然必得長者為之校訂言次不勝其嗚咽余雖病困餘生而誼不容辭乃即在此覓得毛氏手民



為作仿宋精槧力疾校訂至冬而蕝事方知君詩學之深造自得迥非我輩之信口狂吟者可比其五古酷摹漢魏樂府得三百篇比興之遺間有記事之作參用元白體裁而亦能加以矜鍊七古辨香院花草堂幾於升其堂而躋其闕間有疎宕處亦復高岑之亞七律頗近許丁卯而精整之中仍能疎密相間五律則神似劉長卿賢人四十未嘗雜一屠沽唐人七絕爭推龍標作者頗得其旨趣彌覺言有盡而意無窮蓋君之學詩竟欲溯宋祖唐故於宋人剽滑縱恣之習一掃而空之雖我所譽者未免揚人之善而過其實而窺君學詩之志實

香雪齋詩鈔

序

三

欲取法乎上其尚不能登峰造極者非巧力有不足乃年命限之也宜為周公所傾倒至於此極謂未知於古作者何如就其姿力之所造亦可謂能於其事者矣大凡文章一道非有心得者必不能道人之所得觀周公所推許者而其抱負亦可見矣且鄙人亦牽連得書謬見推重其實余在京時但於大拜時曾一奉謁嗣亦不甚往還惟於錢湘吟世文處得陪談讌而已即吾弟於公為屬吏之日亦甚淺初未有事業文章略酬知遇而乃聞聲相思於愚弟兄被以荀龍之譽嗚呼古所謂愛才如命者如周公庶足當之然吾見世之愛才者亦不



過贊歎其才痛惜其遇有所愛於人無所鬱於己也乃  
觀序中所言竟有反袂嗚咽清泪緣纓等語直與父子  
兄弟之親同其悽感嗚呼先生於身世之間豈別有所  
感而特借吾弟之詩以發之耶不然何其言之悲也序  
中特囑震姪歸呈鄙人點定斷為必傳之業戒勿令他  
人妄意刪存致失旨趣且許以朱提五流為助劖劘愛  
重至此蔑以加矣故余今所校訂者多屬鈔胥舛誤而  
並非原稿有疵且未刪去一首亦守序中所戒也五古  
中兩押旨字皆入平韻不知所本特質之俞曲園先生  
俞亦庚戌前輩共推為海內經師者亦告以是必有本

香雪齋詩鈔

序

四

戒勿輕改亦足徵君之博覽矣余於君實難為兄所言  
亦豈足為君重惟佩君詩學之精深且感周老前輩所  
言之沈痛特表而出之以示震姪姪詩學尚未深造而  
時藝試帖皆能酷肖乃翁故得歷受宗匠之知今雖筮  
仕來吳而尚未引對來年猶欲一戰秋闈以冀遂顯揚  
之志亦可謂有志之士余則以為經濟文章皆足報國  
況父登拔萃子舉優行 廷試並列優等適合唐人通  
榜取才之制家學淵源於茲可見即不能再取科第亦  
足自豪但願姪勿忘先人懷才未遇賡志以終而克自  
振拔他日立身行道揚名於後世則先人此集亦可因



以傳之無窮是則余所深望而亦不負周公序中善人有後食報不誣之言刊成有日姪可楚詩一部遙祭周公而告之想吾弟在九京亦必以為得一知己可以不恨也

光緒十有八年歲在壬辰嘉平月望後一日同祖兄達雙力疾序於吳下厲廬之墨花吟館

吾弟之詩固多奇構周公之序亦屬異文非異其文異其所以為文也故既序吾弟之詩而並序周公之序亦序中創格也蓋非此無以表周公而報周公耳後之覽者亦將有感於斯文

達雙附識

香雪齋詩鈔序

五

叔芸前輩後由左江觀察擢任兩粵都轉係官場著名天下第一膏腴之地乃履任未幾即引疾去官本係越人而寄藉大梁故亦無家可歸僑屬吳中賃居長慶里費芸舫太史之屋即余癸未年奉母居喪處也惜余其時已移家滬上不及重奉教言而公亦遽歸道山觀公進退之際殆必有不諧於流俗者復觀序中所言是亦古之傷心人也余因感公愛重吾弟之意故特附著於此

達雙又識



香雪齋詩四卷嚴遂舟內兄所作也遂舟篤內行性儻工詩古文辭為諸生時應學使者試輒冠高等甲子游京師余方由翰林侍讀改官雲南迤東道將之任以父憂解職旋賦悼亡鬱鬱滯都下獲交遂舟相與推襟送抱尚論古今事暨詩文之宗派娓娓不倦交益密遂以從妹許續余室時芝僧內兄奉母居鄉里議未決遂舟南旋堅持前諾遂申以婚姻之好嚴夫人來歸遂舟以辛酉拔萃

廷試擢知縣籤分桂林余備兵京口宦轍分馳不復如都下游讌之樂也尋余移蘇松太道遂舟知左州事受

### 香雪齋詩鈔

#### 序

瘴癘病歿於南甯道次余與嚴夫人聞訃而慟夫人並哭以詩遂舟生有異姿九流百家之學靡不貫徹詩法盛唐官左州有聲大吏知其賢將移治大邑而卒於庠何天生斯才而又阨其遇耶抑工於詩者必終窮耶今其長子芙蕖內阮能以文章世其業以優貢生為桐廬遂昌等縣校官改江蘇郡守誠克家令子也初余即家拜京尹之

#### 命芙蕖以優貢

廷試留京延為兒子師距昔與遂舟游已將卅載而談藝之樂先後一轍及余權兩江督篆芙蕖已改官吳下



檄監楚西嵯稅公暇校定先集謀付剞劂索為一言遂  
舟之詩清真雅麗若嘉禾竹枝詞等詠士林爭誦登錄  
輜軒奚待惶引夫人生之才與祿命造物能忘之而靳  
弗與雖智者勇者不能以計取而力爭唯造物之命是  
聽獨其後昆之盛衰成敗必視其生平所為而量與報  
施有毫釐不爽者豈復得以忌之而靳之乎故余撫是  
一編知芙蕖之弗墜手澤異日稱名於後世更無以測  
其所至也余行年七十有三矣嚴夫人已先我而逝遂  
舟去世已二十年往事追思存亡異路和淚書此以勵  
芙蕖兼以自慨云爾

香雪齋詩鈔

序

二

光緒壬辰季秋妹輩此秉成謹識于皖江撫署



題詞

表獻通天獨上臺胸中抑塞盡傾來將游冀北求真賞

君欲游京師

解賦江南亦雋才狂狎酒徒呼籍卓縱觀海市

類登萊

近客海門

何時烽火家鄉靖句採蘋洲笑口開

壬戌新秋用前登文游臺韻抱冬江儀吉

劍氣珠光兩不磨果然騰跋上 鑿坡糊名取士偏多

倖通榜求才獨此科

鄉會試令甲糊名易書獨拔萃一科試於提學不糊名試於殿廷

不易書且必先舉優行而後與選猶存唐人通榜遺意

海內詩家能有幾 殿前

賦手又如何

弟紀恩詩云殿前作賦知難比選卷同焚乙夜香

此生不入承明

選畢竟蒼天缺陷多

香雪齋詩鈔

題詞

乃兄清妙追摩詰

謂笠篋弟

而我粗豪學退之偏勝總為天

所限兼長獨讓子能奇蕪城花月供憑弔燕邸琴樽繫

夢思此後篇章當變體宦游飽讀柳州詩

庚午花朝緇生兄辰題於半學齋

詩以道性情詞華非所尚雄渾與清新唐宋時遞降李

杜擅奇才蘇黃推絕唱風氣隨轉移後先相韻頽巖若

本天才作吏來燿瘴行李只一肩身外無物長列宿羅

心胸萬卷詩囊壯琳瑯特示余下問存謙讓鯁生少鈍

頑學問無一當詩律更不知偶吟亦孟浪今日讀君詩

頓覺心神曠陶鎔格調高抒寫情懷暢有時句欲仙妙



諦空塵障有時氣凌雲狂歌天欲上題賞多名賢騷壇  
推健將養到復功深造詣安可量名吏多能詩古今應  
同樣手卷坐琴堂風雅化愚妄花落訟庭閑朗吟午衙  
放他日著循聲始信余言諒承君命綴詞舉筆增惆悵  
勉效巴里言續紹愧無狀跋詩兼頌君勳名拭目望

庚午闈中范陽鹿傳霖滋軒甫稿

香雪齋詩鈔

題詞

二



評語

五七古無一梗調誠為難得近體亦清麗居宗生年正富宜究心有用之學置詠歌為餘事可也丙辰七月下僻錢塘戴熙書於崇文講舍之仰山樓下

清轉華妙情文相生讀之如對孫家琉璃屏四照皆徹又如飲白傳防風粥七日口香甲子修禊日金安瀾識於崇川寓齋

大著五古胎息六朝色韻俱似七古蟠胸豪氣雅近韓蘇律詩情致纏綿合温李元白為一手雒誦數過佩服無極惜將匆匆出都不及與諸君子朝夕觀摩受切磋

香雪齋詩鈔

評語

一

之益敬跋數語以誌服膺丁卯出闈後三日金坡徐鑾書於春明客寓

尊稿循誦數四筆力工夫兩擅其勝真騷壇好手也此稿係丁巳以後所作未識以前大著攜在行篋否讀難中諸作恍展杜陵全稿殊有沈鬱頓挫之觀拙作相形益如塵羹土飯未知肯為我點定否貴體近日清健如蒙過我當為半日談戊辰中秋後五日寅初鮑存曉時同客春明



自敘

僕髮未燥喜為韻語自癸卯迄乙卯得詩三百餘首半  
多酬應應試之作且其時專攻舉子業未遑兼務所作  
率不足存丙辰丁巳讀書西湖之濱得詩一卷以歸嗣  
後稍稍留稿庚申避寇鄉居抑塞無聊輒藉以為排遣  
計頗有增益旋由申江北渡歷游維揚吳陵秦郵崇川  
馬洲甲子游京師四年中共得詩若干首逾年兩浙平  
遂挈眷由吳陵歸丙寅以選貢復游京師旅食三年作  
詩最少

山陰徐君自叙  
廷試後試吏粵西因病假歸迨庚午夏始航海而南自  
香雪齋詩鈔

自叙

羊城以達桂林是年冬捧檄權左州牧州去省千二百  
餘里萬山籠從鮮有人跡案牘多暇時復吟哦忽忽三  
年受代將去爰輯丁巳以後所作共得六百餘首刪存  
四百二十首益以少作數篇列之卷首屬人編錄之釐  
為四卷題曰香雪齋稿仍故居之名也雖不敢自信為  
工而於半生遭際游歷及一切可歌可泣之事悉於是  
乎寄日後有得當續編之昔人云大丈夫居世生當封  
侯死當廟食如其不然閒居可以養志詩書足以自娛  
州郡之職徒勞人耳又云雕蟲小技壯夫弗為然則予  
四十無聞以五斗米奔走八千里外而僅珍此敝帚之

藏也。不良。足慨乎。癸酉又六月下澣。迪周氏自書於古  
攬官解之環翠閣

香雪齋詩鈔

自叙

二



目次

第一卷一百四首 丁巳至辛酉前  
列少作數篇

第二卷一百十一首 甲子至  
辛酉

第三卷一百十首 庚午  
甲子

第四卷一百二首 辛未至  
癸酉

香雪齋詩鈔

目次

桐鄉嚴 鈞迪周

練塘夜泊圖

煙水浩無際一燈秋影涼  
篷窗今夜泊清夢繞迴塘岸  
闊蟲吟月天高雁度霜  
蒹葭空遠望何處是滄浪

雜興

賣錫聲裏過花朝  
新綠如煙鎖綺寮  
香几暖翻金鴨火  
酒瓶嫩養玉雞苗  
愁邊書卷聊遮眼  
瘦後衣圍不稱腰  
擬向鷗波分片席  
烏篷艇子坐吹簫

牆角新篁逐寸添  
映階書帶綠纖纖  
未風簷鐵聲先動  
香雪齋詩鈔 卷一 一

欲雨篝燈焰不尖  
啼老黃鸝猶憶酒歸遲  
紫燕漫垂簾  
北窗自有遊仙枕  
蝴蝶閒騎到黑甜

烏大將軍廟銀杏樹歌

相傳墓在神座下

叢祠日暮鴉呼羣  
訪古人說烏將軍將軍遺蹟不可見  
一株老樹撐青雲  
徑量何止十圍大  
天半風來發幽韻  
繁陰遮徧殿  
三楹尚有餘根出  
牆外比鄰時見青羊青  
疑爾日久通精靈  
或云夜深起光怪  
紅燈點點懸中庭  
事近荒唐我無取  
憑弔蒼涼展神宇  
當日將軍血戰勞  
車溪一旅驚風雨  
軍門望氣已全墨  
大厦難憑一木力

猶擎砥柱鎮東南  
鐵石肝腸自剛直  
徧裨舊將鞭撻隨



馬革收得沙場屍上智潭邊築坏土手栽此樹為豐碑  
迄今幾代滄桑換元精耿耿當中貫彷彿錦城丞相祠  
參天古柏思炎漢我聞太尉家中樹僅有新詩永叔賦  
又聞遺植太清樓裕陵嘉賞今無留一時玩好娛心目  
起滅煙雲失喬木焉得神靈呵護長年年樹作前朝綠  
百徧摩挲感歎交何殊銅狄卧荒郊西風落葉知多少  
吹上將軍舊戰袍

過梅涇枯道人草堂

一徑入溪口藤蘿深閉關買花和雨種汲水帶雲還風  
味高瓶隱生涯託硯山夜窗同剪燭相對愧塵顏

香雪齋詩鈔

卷一

二

食蟹

白蘋風急空江秋老漁結斲排中流夜深篝火照沙嘴  
巨魁爭向三卯收書生縱無食肉相吏部雙螯肯多讓  
朝來食指忽動搖出門喜覩輪困狀葦蕭束縛何太急  
珠沫霏霏吐腥溼入釜猶含稻穗香登筵先搗薑芽汁  
霜毛擁戟勁透爪夾舌須防人絕倒我乏橫行一世才  
枯腸借爾無腸飽豹紋赤裏鷲子黃醞釀秋味在一筐  
奮手樽前擘作兩揭開鬼面流瓊漿滿口雌黃恣大嚼  
外骨堆盤漸紛錯回憶爬沙舊日形蘆灘夜雨潮初落  
九月十月剛及時漫誇鱸膾香莼絲擘去常憐放翁禁

放翁詩庖厨得來可換蘇公詩舊傳妙法糟糖製俊味  
仍禁擘團臍當年悅煬帝青州方物稱蟹胥螳醬魚醢共調劑紛紛  
造作漓其真酸醜雜下烏足論何似茅堂一樽酒琳瑯  
者熟充盤飧東籬黃菊開無數郭索更煩魚戶捕螿螟  
不識亦偶然霜老吳天莫坐誤

晚過南湖

日暮扁舟急秋高萬象澌荒煙三畝竹新水半湖菱樹  
噪歸巢鵲磯停待渡僧微茫城郭外孤塔聳峻嶒

懷蔡嶧琴

瑞柯

臘酒出缸微帶渾一壺自向紅鑪溫草堂梅花開作雪

香雪齋詩鈔

卷一

三

不見故人來叩門

題兩當軒詩集

拚將全力作詩人變化風雲泣鬼神千古豪情懷太白  
三秋騷怨託靈均非無知己猶妨遇儘有才名不救貧  
早歲莫悲長吉天此君原是再來身

讀餅水齋詩弔舒鐵雲先生

鬢齡愛讀先生詩一鱗片甲知護持管窺恨未得全豹  
青林黑塞勞神思今日一編忽在手奇氣闖然驚戶牖  
唾壺擊碎神飛揚大白直須浮一斗淋漓元氣溼滿紙  
筆墨不隨人共死悠悠六代文人魂攝入毫端聽驅使



我讀先生詩我悲先生遇春官屢上不稱意潦倒楊朱  
哭歧路杜甫常為諸侯賓相如空擅子虛賦軍門草檄  
夜燃燭百萬貔貅仰片牘檀書眉墨亦等閒何日虎頭  
飛食肉捫蝨誰傾王猛談聞雞空擾劉琨宿可憐萬卷  
撐場破煮字那能救窮餓南窮洱海西函關到處狂吟  
不求和風雪蕭條雙鬢摧年年破被堆中卧先生有破被詩感傳  
於同時作者王子猷王孝廉曇世傳萬古煙霞樓與君戚誼  
屬中表各挺椽筆爭千秋兩君文章遭際如一轍才人  
志士聞者皆淚流躍馬何年返鄉土老去雄心變淒苦  
瘞骨卻在青谿頭破廟殘魂泣風雨先生客死吾鎮瘞東谿老禪堂側

香雪齋詩鈔

卷一

四

我欲相酬酒一盃更攜詩卷弔泉臺有靈詞客如相識  
敢道陳琳是霸才

哭周庚三師恭先

廿載親承杖履聲晚年尚倚筆為耕文章事畢留千古  
師弟緣長結再生獨行不煩人作傳遺言尚許我成名  
憑棺一慟知無補白髮泉臺鑒此情

戊午中秋夜闈中遣興

下筆千言滿空桑三宿過房連蜂子窄士比鯽魚多文  
酸騰蓮炬秋香散桂柯照人天上月明鏡出新磨

寄呈房師程曉岡先生

培勳并乞同門錄

文陣爭傳不識軍品題聲價更超羣望塵未立程門雪  
競爽深慙陸氏雲笠溪兄同房蒙薦但得賞音終此曲已無遺

憾到斯文

主司三場評語皆佳列入堂備卷

鴛鴦譜上多新樣可許金

鍼慧業分

花溪晤馬小溪表兄

晉康

雨窗夜話

茶熟香消夜漏殘小窗花雨撲燈寒  
碁邊綠野愁重過

舅氏故居已屬他姓

畫裏青山賣亦難  
偕隱林逋無鶴子  
食貧閑

叔有豬肝

君子身寄食又生舅氏處賣畫為活

呼僮為蠟尋幽屐九十九

峯邊共看

聽心如從弟鏡吹笛

香雪齋詩鈔

卷一

五

南樓酒罷月斜時  
畫燭銀屏客散遲  
四座無言聽一曲

居然風韻似桓伊

曾攜玉笛下揚州  
吹破空江一片秋  
又是落梅時節近

綠楊城郭陣雲愁

弟少遊邢江

看月

滅燭倚虛堂  
靈蟾逗素光  
溶溶過藥圃  
悄悄下蓉塘  
宿

鳥驚天曙  
愁人覺夜長  
遙憐青桂下  
仙露溼衣裳

夜泊平望偕笠溪兄

錦

月黑天無影  
波聲到枕流  
庭闈今夜夢  
兄弟此扁舟  
遠

柝攪疎雨寒  
衾逼暮秋  
推篷不成寐  
雙雁起汀洲



秋江詞

天末盼歸鴻秋風幾千里昨夜落芙蓉冷入湘江水

鷹石為張杏南廣文

東琛賦

子野齋頭有奇石入骨秋筋嵌深碧雙肩瘦聳一足拳  
獨立紫檀勢斜側金方猛氣炎火精長天正散瑤光星  
墮地忽然化為石崢嶸頭角猶如生相看不覺神一王  
熊生咫尺千里情玉門秋老霜鋪地赤燒連天散邊騎  
日暮圍場射獵來攬身飛上胡兒臂破空作勢盤高秋  
雄心欲竟天盡頭紛紛腥雨灑毛血可憐雉兔空山邱  
今見爾形吁可怪英物不受人輕拜爪深目努刻入神  
香雪齋詩鈔 卷一 六

不數齊王壁上畫斂翼似就鞬條羈奮翮定嫌天地隘

吾聞有石名角鷹九江太守曾見稱

屠琴塢先生

安知此石

非舊物依然得飽思飛騰勸君密室珍藏好日落空庭

下飢鳥

哭胡介愚

履卿

六十韻

磨蝎身宮厄斯人命遽遭傷心來惡耗撒手謝塵囂

臨危

屬陳君秋泉繪撒手離羣圖

數載交深訂三生契獨叨感君知己切

令我寸衷忉慧業金環證清姿玉樹高綠誇潘鬢少青

戒鄭衿佻何舅真神似

君舅氏沈曉滄司馬台簪明府

黃童自幼褒芸

編晨案讀齋粥夜窗熬竊慕談經樂何嫌負篋勞壇寬



新種杏洲古屢尋桃

從師安吉學署師歿後繪桃洲感舊圖

接物無圭角

隨人異桔槔學非矜耳食書不厭牙警類水生芹藻童

軍聚俊髦果然千里足得遇九方臬繡虎才華富元龍

意氣豪欲攀廣寒桂去看浙江濤入殼希穿鵠懸鈞擬

釣鰲文章憎羶穢霄漢失翔翺兩下劉蒼第長吟楚客

騷胸襟同落拓冠佩足嬉敖北海樽開孔東籬菊種陶

燈紅邀斫鱠霜白話持螯瘦詭裴郎肥鶴太尉羔畫

圖工染翰詩句競題鮫

君種菊百種花時招人譜賞繪西溪菊社圖題詠殆徧鶴

菱支公籠魚觀莊子濠圍碁彈暖玉按曲譜雲璈花柳

金閨豔煙波畫舸操

君有虎邱送別鴛湖泛月兩圖

悄聽風外笛沈醉

### 香雪齋詩鈔

#### 卷一

七

月中醪香塚摩碑辭名祠薦芷芼

君有真娘墓蘇小墳韋蘇州祠陸宣公祠

諸詩絕佳

探幽雙不借撥悶一檀槽梓里方歸櫂菰城又放

篙壯懷游未倦勝景記還牢會友文常角爭雄筆可鑿

竹中欣結社座上快揮毫

予家小竹林文社君亦與焉

疊韻琴頻奏

同功繭互縲靈緣聯翰墨仙節降旌旄

端木子彝先生降鸞賜君楹帖

多喚醒槐黃夢因披李白袍家貧謀祿養官小列閒曹

援例以縣尉銓選

烽火連江逼英雄逐浪淘前驅思負弩獻凱

望垂囊從此帷辭董相期檄捧毛驪淵珠忽碎昆水玉

空撈店竟憑齊作妖難詠杜逃徧求醫下藥爭奈豎居

膏冰雪柔腸咽

病瘧時索飲冰水盡一甌

風霜弱質饜形銷餘立骨



氣屬等懸麓駕渚經旬別鵝林永夜誓似聞將易箒尚

盼早歸舟

予親君疾後旋赴禾郡歲試君日盼予歸謂當訣別及予歸而君已不能語矣 噩夢

驚棺下凶爻筮棟撓招魂徒翦紙遺像宛垂縑少婦紅

顏慘衰親白髮搔

君翁蘭香先生及母夫人俱在堂

隨肩餘弟幼抱膝

任兒號哀思催鄰笛悲歌起里蒿酒停壚畔飲劍缺匣

中鞞辛苦搜殘稿珍藏待劔刀何年能告慰

君詩文稿均予校定

此日枉號叱塵禿王家尾輪乘列子尻竹樓關雨冷蕙

帳捲風颺蠅逐嘉賓弔蟬吟怨女嘈西溪愁再過流水

逝滔滔

題介愚遺稿

香雪齋詩鈔

卷一

一編遺稿校初完似有靈風繞筆端此事略酬知已意

他時便作古人看豹經隱霧文終在蠹不成仙字枉餐

絕代才華埋地下光芒應射斗牛寒

郡城東塔寺觀神僧頂骨

鐵鳳凌空舞明月虛室老僧夜縫褐起身導我登佛樓

檀中出示神僧骨此骨留傳今幾年仰盂覆盃其質堅

依稀舍利所生處尚有數竅明泓然髮色金銷古佛相

頂光白放觀音圓看罷老僧重翦燭為說屠公宦函谷

官齋三載伴神僧方眼澄碧長眉綠宦成公欲還鄉里

臨別當筵忽長跪作佛何須定放刀手擘半顱贈知己



獨證金剛不壞身能通大乘無遮旨攜歸萬里隨行裝  
終夜作作生光芒佛頭何因得著穢清淨合向斯樓藏  
樓深夜靜怖飛鵠精靈曠代如相接西方宗旨遁虛無  
不道此僧偏近俠渾渾噩噩枯龜形想見醍醐曾灌入  
欲伴金經置石函敢作銘詞擬碑塔我聞游者談九華  
新羅老衲遺袈裟我昔禪林參法海定光肉身至今在  
禾中逸事非無稽捨鬚靈運同神奇百遍摩掌比銅狄  
一般佛髮盛琉璃迎來恐動韓公表擊去應遭趙鳳椎  
尋思轉復笑荒誕等此人身骨一片戰場積似恆河沙  
月冷風淒佛未見

香雪齋詩鈔

卷一

九

精嚴寺雲深堂

簾櫳風靜篆煙輕小坐團蕉百慮清三月春陰濃似夢  
一林香雨溼無聲閒僧與鶴共忘語古佛笑人猶好名  
何日深山真結屋匡牀高臥看雲生

宋高宗賜岳忠武奪情敕墨蹟

從古忠臣即孝子豈有親喪應詔起從古守經貴達權  
男兒忠孝方兩全當時南渡朝廷小中原誰把風塵掃  
不許將軍歸葬親破碎江山期再造十行御墨軍中賜  
移孝作忠伸大義龍蛇著紙勢飛騰輝映將軍背上字  
忍見攀髯雪窖天誓將唾手燕雲地吁嗟乎三字獄丞



相錄一杯酒君王辱他日金牌奉詔行十載之功一旦  
傾誰識將軍能守經

西湖遇姚大

去年溪上梅花開與君日日銜酒杯無端躍馬出門去  
歲暮臘殘猶未回今朝邂逅西湖上天朗秋高氣清曠  
拍肩同上酒家樓肝膽輪囷一傾放抵掌高談別後情  
感來不覺聲悲壯荒城落日黯石頭燭天烽火連瓜州  
眼看戰格連雲浮笳聲吹老霜天秋鬥雞少年定何物  
乃亦談笑輕封侯十年未擲班超筆對此蓬蓬生氣出  
拔劍朝歌游俠篇呼燈夜譜關山月六韜三畧傳陰符

香雪齋詩鈔

卷一

十

一讀一擊紅珊瑚酒酣耳熱氣尤振時或踴躍時呼盧  
旁人一見眼雙白同學多年思割席壯懷肯負呂虔刀  
名心羞射劉蕡策舳艫千里橫江行安西都護方出征  
懷中有刺投不得千秋笑煞禰正平形容枯槁面黧黑  
掉臂仍歸江上城錢塘江近得秋早洪濤入夜聲如擣  
欲覓扁舟返故鄉倦游轉覺家園好江湖落拓年復年  
幾見英雄得歸老聞君此語發三歎我輩于時判冰炭  
頗憶騎鯨東海頭與誰射虎南山畔有志無時古所悲  
況今兀兀弄柔翰何當破浪乘長風直駕浮槎抵天漢  
男兒如此洵可憐舉酒且酌當君前鳳凰山高生暮煙



相錄一杯酒君王辱他日金牌奉詔行十載之功一旦  
傾誰識將軍能守經

西湖遇姚大

去年溪上梅花開與君日日銜酒杯無端躍馬出門去  
歲暮臘殘猶未回今朝邂逅西湖上天朗秋高氣清曠  
拍肩同上酒家樓肝膽輪囷一傾放抵掌高談別後情  
感來不覺聲悲壯荒城落日黯石頭燭天烽火連瓜州  
眼看戰格連雲浮笳聲吹老霜天秋鬥雞少年定何物  
乃亦談笑輕封侯十年未擲班超筆對此蓬蓬生氣出  
拔劍朝歌游俠篇呼燈夜譜關山月六韜三畧傳陰符

香雪齋詩鈔

卷一

十

一讀一擊紅珊瑚酒酣耳熱氣尤振時或踟躕時呼盧  
旁人一見眼雙白同學多年思割席壯懷肯負呂虔刀  
名心羞射劉蕡策舳艫千里橫江行安西都護方出征  
懷中有刺投不得千秋笑煞禰正平形容枯槁面黧黑  
掉臂仍歸江上城錢塘江近得秋早洪濤入夜聲如擣  
欲覓扁舟返故鄉倦游轉覺家園好江湖落拓年復年  
幾見英雄得歸老聞君此語發三歎我輩于時判冰炭  
頗憶騎鯨東海頭與誰射虎南山畔有志無時古所悲  
況今兀兀弄柔翰何當破浪乘長風直駕浮槎抵天漢  
男兒如此洵可憐舉酒且酌當君前鳳凰山高生暮煙



乘月醉踏山之巔試將此意一叩蒼蒼天

寄友

依然短褐未長纓慷慨王郎斫地聲人為羅橫憎命達  
世留殷浩待時清淮南烽火驚銅馬池上秋風動石鯨  
十畝田園歸亦得同牽黃犢學躬耕

讀先伯順寧公遺集

白首邊關路豪吟意灑如一錢劉寵傳萬卷杜陵書簿  
宦成春夢高懷負遂初挑燈深夜讀山鬼重歎歔

又和太白樓詩

萬古此明月千秋一酒樓仙人不可見江水自長流彌

香雪齋詩鈔

卷一

十一

望白雲盡思乘黃鶴游青蓮花久落杜若滿芳洲

題朱梅叔明經

明清

埋憂集說部

孤憤書成已白頭人間無地可埋憂奇文不礙搜干寶  
穢史微聞謗魏收零落椒蘭山鬼泣荒唐雲雨楚王愁  
棗梨未壽名山業遺稿他時備世求

待梓詩古文  
詞集甚多

題張蓉鏡文

元吉

詩稿

昨宵夢裏攜枯籐衲衣風帽似老僧羅浮山路橫峻嶒  
淡煙斜抹天空激林際却露月半枝照見石磴苔層層  
千迴百折循途登梅花仿佛描吳綾萬枝香雪堆成冰  
胎禽夢穩喚不應獨立高處寒難勝玉樓肌粟生凌兢



覺來清氣填胸膈，手揩雙眼祛曹騰。讀君詩卷挑殘燈，  
口嚼冰雪寒香增。方知夢境非無憑，乃君詩境之所凝。  
惟君詩律參上乘，空中側翅盤饑鷹。盛唐矩矱摹高曾，

大勇豈必誇河馮。共扶大雅歸墨繩，美人香草真詩朋。

同里吳香圃先生著香草軒詩稿一規唐人故紙兀兀鑽凍蠅，滿頭霜雪飄。

鬢髻少年幾輩，鯤化鵬枯魚失水難。破曾東游攜李西

吳興春風桃杏秋，芰菱青鞋布鞵常。畦塍名山欲訪誰

擔簦歸卧老屋如巢，槽竹樓空慕王禹偁。桃花米帶藜

藿，蒸坎坷旋被造物憎。祝融兩度相欺凌，窮鳥何從逃。

繳，增廬黔垣赭書城。崩錦囊已燼無片，繒枯腸搜索重

香雪齋詩鈔 卷一 二

手騰舊觀到眼一一，仍千金敝帚更足矜。削劂望我他

時能嚴詩編，杜名附稱我非僕。射君少陵或恐一諾難

為徵，請錄貳本藏行。滕頂禮，島佛尊師承騷壇。祀典供

豆，登良醫業擅三折肱。起衰末世砭結癥，蠅鳴蚓竅皆

螟螣。力追正始厲勸懲，長城五字掇陝陝。不屑爭長儕

薛，滕鈞天廣樂超凡。恆箏琶俗耳非相應，瞳矐朝日搏

桑昇。紫霞絢爛紅雲蒸，照耀奇景得未曾。我思玉宇瓊

樓，憑鈞鰲碧海掣巨絙。癡龍掉尾牽車鞞，散花天女鬢

髮鬕。笑搗羯鼓聲，鑿鑿仙厨有酒寬。如灑手招太白兼

右丞與君狂飲盡，數升高吟響落山崢嶸。同使下界驚



吟

沈孝子雪山圖歌和容鏡文

原序孝子名蒼樹桐鄉人其父諸生乾隆

間遣戍孝子萬里隨行父卒戍所奉柩歸葬繪圖誌哀徵題

雪山皚皚積飛雪界斷中華勢橫絕千秋萬古無時消  
結就奇人一腔血奇人者誰沈孝子隨父荷戈去鄉里  
歸來寫作雪山圖為痛兒歸父已死我聞瀚海無窮邊

黃沙萬里空人煙中有一山名祁連

天山即祁連山又名雪山見後漢書

注

四時皆雪光瑩然十月窮冬尤可憐旌旂冰捲如鐵

堅尖風銳裂征袍繇枕戈士卒僵不眠中夜鞭轡饑腸  
煎掬雪大嚼和駝羶直似看羊海上年十載刀鐮猶未

香雪齋詩鈔

卷一

十一

卜衰年兀兀驚風燭眼懸雙淚凍不流孝子抱父向天  
哭謂天有耳天無情雪花一夜飛邊城帳外鳴鴉作鬼  
語荒荒大漠悲風鳴悲風吹起月輪黑愁絕絕羈魂歸不  
得幾人生入玉門關誰負親骸返鄉國奇哉孝子世罕  
有萬里孤身輿櫬走寒光四射麻衣穿百煉肝腸熱熾  
手馬鬣高築桐溪邊芳草年年醜杯酒崎嶇歷盡誠苦  
辛地下得慰長眠人試看白鶴遼東返尚認陰山雪滿  
身

寄姚大

柳雨茶煙護一廬青溪自占好幽居夜窗燈火長於晝



來讀人間有用書

感事

節鉞名高舊史官，丁年冠劍獨登壇。石頭功未收，王濬江左人猶望。謝安東國酒漿爭，戴道南樓風月幾憑欄。重經細柳營邊路，夜雨烏啼萬幕寒。

鍾阜沈霾黯不消，頻年烽火逼金焦。帆飛極浦千艘涌，草長平原萬馬驕。將略未應輕向寵，威名猶共震張遼。可憐幾輩經營力，付與江頭一夜潮。

避寇之筓溪

離家無十里，風景似桃源。古木紅藏寺，春田綠到門。宅

香雪齋詩鈔

卷一

十四

幽環水竹社，小散雞豚鄰。叟時相過，茅柴暖瓦盆。

睡起

桑柘陰濃四月時，當軒新喜竹牀支。一聲幽鳥喚殘夢，紅日滿窗人未知。

八月四日還家

朝起聞寇退，意氣如一伸。鄉人三五輩，為我駕歸輪。半途心恇怯，欲進重逡巡。漸露市廛隱，見居民間有炊煙起。犬吠聲狺狺，溪東數百戶。幸未化荆榛，北望盡焦土。屋瓦無片鱗，吾廬靈光殿。歸然倚河濱，到門急繫權。河有新死人，男女約三四。一兒僵抱身，面目略可辨。



知為西家鄰，入門何所有。四壁徒嶙峋，窗戶與几榻。大半摧為薪，庖厨積破甑。倉廩餘空囤，階下滿荒草。散落錢數緡，問我讀書處。琴劍多消淪，問我飲酒處。孟盤不一陳，樓頭藏萬卷。我祖手澤珍，狼籍雖徧地。整理猶如新，我父鄉居久。病榻方吟呻，茅舍苦偏窄。妻子皆悲辛，急思返故居。全家甘食貧，深恐賊復至。不及避暴秦，其時賊東犯，攜李踞城圍。相去六十里，礮聲宵達晨。土寇况蠡起，劫掠聞頻頻。賊去收餘燼，賊來步後塵。禍機伏肘腋，尤比蕭牆親。兩端持首鼠，去留亂我神。須臾日西薄，四面飛碧燐。恍惚聞鬼哭，百蟲啼草茵。庭柯蹲怪鳥，

香雪齋詩鈔

卷一

五

聲若人怒嗔，夜深秉燭坐。涕淚流盈巾。

哭心如從弟

慧業能妨命，牢愁更損年。吞聲辭白髮，避世到黃泉。荒草池塘夢，空花鏡裏緣。

結襦甫六月

廣陵留百詠，合共竹枝

傳弟著廣陵雜詠一百首

哭韻山從兄 鍾

病骨疲奔走，扶牀淚不乾。還鄉猶作客，多難誤求官。

父伯

崑圃公全家宦游淮上，兄子身歸家將以縣尉需次，江蘇方擢，攜起行而蘇省失陷矣。

腰囊黃金

盡頭銜白旒，寒雁行連折。翼腸斷拊雙棺。

去心如弟之亡未及匝月

重之笙溪



亂餘身世任飄零一曲清溪權又停尚有主人尋舊館  
更無名士泣新亭塵沙結霧秋陽淡草木呼風夜氣腥  
不賦從軍賦招隱腰間短鐵久無靈

雜詠

赤鳥向西匿皓月流東廂美人卻膏沐永夜居曲房盛  
年憶光景結轡生迴腸懷中理瑤瑟座上呈玉觴瓊姿  
豈自薦幸侍君子旁繁華忽消歇翠蛾嬌不揚手爪非  
敢惜織錦機九張風塵識者寡辛苦不足償私心復自  
慰尚恃年齒芳朝來攬青鬢變絲絲霜塞幃盼蟾魄  
泣下沾衣裳

香雪齋詩鈔

卷一

六

其二

長風動喬木終夜為悲聲春暉照小草一去無留情讀  
書志通顯年少珍令名豈其炫流俗萬一酬所生人生  
非金石日俟黃河清坐令牛山上涕泗交縱橫賦命由  
大造安用才智爭白骨盈溝壑若者得玉成欲就磨尹  
卜龜筮術難精鳴鴉况毀室豺虎紛盈城精衛銜木石  
缺陷何能平

皇甫霞恣丈

福虛

自碓溪過訪

終年歌哭向誰真十畝之間寄此身不道閒來還過我  
可憐君亦未歸人窮途蘇季黃金盡流寓蘭成白髮新



日暮風寒天欲雪臨歧贏得一霑巾

東菴鏡文

一面如千里相思歲盡時風塵枯樹賦涕淚浣花詩寒  
重衣猶褐褐憂深髻易絲空勞計歸客何日是歸期

雨後觀水

白雲起山谷潤物為甘霖一氣恣奔放下界愁其淫萬  
事貴知止適可乃愜心殘冬苦積雨十日而九陰森森  
田疇沒浩浩陂塘深魚游樂空闊蘆朽根株沈攬衣望  
朝旭紫氣生遙岑雙眉豁新爽刷羽同樹禽遐思朱夏  
節火繖空中臨大地受焦灼入釜身如煇安得數點雨

香雪齋詩鈔

卷一

七

一洗塵盈襟

寄沈北山

梓

去年別我青溪頭文園卧病君亦愁今日懷君北風裏  
一水迢迢阻雙鯉出門路上逢君鄰道君近事多悲辛  
紅顏少婦蒼顏親珠炊米粒桂蕪薪江湖滿地行不得  
仰屋坐歎生甑塵懷中君有如椽筆羈樓銷盡封侯骨  
我亦人間憂患身迹蹟鄉園感蕭瑟夢裏家山惆悵時  
囊中書劍飄零日頭蓬氣結顏不歡欲語世情摧心肝  
堂堂白日去如駛倏又光陰頻歲寒今年寒比去年早  
去年人病今年好病起懷君君不來君若來時應懊惱



蕭齋虛掩寂無人，落日閒門滿衰草。荒村急雪催殘冬，  
何日尋君移短篷。卻倚高樓望天末，鷺寒陣斷鳴孤鴻。  
孤鴻鳴處暮雲碧，手寄梅花不盈尺。硯田歲惡將何如，  
更詢下帷董仲舒。謂枯絕

東杏南

欲雪未雪風颼颼，同雲閣簷寒不收。我時襪被居荒陬，  
深宵孤坐挑短篝。一寸肝腸叢百憂，思君轉覺心悠悠。  
十年憶與君唱酬，長身玉立迥不侔。胸襟嵇阮才枚鄒，  
仙鶴豈屑羣雞儔。一日無酒心輒愁，生平知己惟糟邱。  
擘窠大字下筆道，金帛往往人爭求。醉中一笑酒沒頭，

香雪齋詩鈔

卷一

六

翠墨淋漓揮滿樓，君時神駿方離鞦。我亦鷲鳥初脫鞵，  
肉食者鄙何能謀。意氣直欲吞金牛，閉戶不甘為楚囚。  
天涯賣賦無人售，墟畔鷓鴣時解裘。日日從事尋青州，  
安得酒似長淮流。使我生死相拍浮，腰間一鍤常隨劉。  
埋我土向陶家杯，君家住近蒼雲洲。卜居我占青溪幽，  
中橫一水區鴻溝。飛牋來往如傳郵，同器何分薰與簫。  
葛藟只解縈南樛，紅藕香中操畫舟。綠蕉影裏陳金甌，  
佳日招我同宴遊。良盟從此訂鷺鷗，華堂客至衣頻摳。  
賞花卻折花作籌，心兵互鬥猜迷鬪。巧奪棘刺雕獼猴，  
東方諧謔嘲俳優。南華妙語參莊周，兕觥大酌雙角觥。



相如渴疾今其瘳忽若兩軍爭觸螻主人拓戟賓援袍  
千金競挽黃金樞中的何人穿四簇偶然一蹶衆口咻  
此方避舍彼復樓銀燭高燒光射眸少年玉笛宮牆偷  
謂笙樓席間君雅亦吳謳曉風殘月聲婉柔惜少銀鬢彈

篋投高唱大漢關西喉銅琵琶鐵板聲雜稠拂衣我復探  
吳鉤雷奔電激飛蒼虬承蜩丈人背倚僂舞器公孫光  
亮劉仰天大笑冠纓抽四座屏息寒颼颼茫茫大地真  
蜉蝣榮枯得失皆浮漚不如醉倒鼾聲齁此鄉信可輕  
王侯吁嗟吾曹樂不休酒星橫被欖槍仇五月南風開

香雪齋詩鈔

卷一

九

石榴長驅壘浪來龍湫嘉興一旗雲裏飄蚩尤其下萬騎

森戈矛古戍有埒排長楸塘溪坐使雙溪遭踐蹂荒草

殘陽寒髑髏空林暮雨啼鵲鷓鴣歡場重到今無由一炬

阿房歸鬱攸君家老屋燬于兵燹故鄉我亦拋田疇荒村寂處聞

禿鶯光陰赴壑脩蛇脩別君時節方新秋一日不見生

悵惆何堪卒歲猶羈留無聊且把書校讐訪戴誰為王

子猷昨聞鄰舍新釀篋開甕一碧光油油青錢急向囊

中搜舉盃獨酌無綢繆籥雲空憶開道騶守拙且作棲

林鳩寄君一紙詞弗修歲寒舊約無相猶無已覓句心

血嘔為問吟懷無恙不

謂秋泉



金溪

略約通村落繞門溪水激新茅承屋瓦枯菜絡簷繩樹  
暖雞眠日田空鳥啄冰東臬逢父老閒話倚紅藤

寄黃菊仙布衣

晉天都

天都峯高出雲表朝暮行雲白繚繞一片飛墮浙西水  
如見故人顏色好故人峯畔舊結廬全家得傍高真居  
山光嵐翠滿几案開門可挹飛霞裾兩鬢星霜氣冰雪  
怪道君身有仙骨作客不戀松江魚若久客松江訪友來看  
青溪月兩人一見心交傾下榻愛我茅齋清蕉夢苦遭  
夜雨惱茗談動及晨雞鳴君性好飲酒我更酌大斗月

香雪齋詩鈔

卷一

三

夕花朝時一杯不離手酒酣與我登高樓意氣磊落凌  
滄洲溪邊花柳縱妍媚那及皖江之水滔滔流徙倚傍  
徨頓袖起為道故鄉景物美氣清天朗惠風和繞屋峯  
巒間青紫峯峯竹翠峯峯松靜聽萬壑酣笙鐘黃精肉  
芝徧山徑鴉嘴斷破青芙蓉攜歸堂上介眉壽萱花垂  
老回春容白雲親舍瞻何處轉悔他鄉作小住夜來邱  
壑夢中游一舸何時剪江去昔年樓上空徘徊聞君近  
日真歸來紅羊蒼狗苦變幻空谷不染昆明灰閉戶知  
君謝塵俗黃庭半卷閒披讀牖下偶吟招隱詩籬曲更  
栽延壽菊前山多少行路人回望幽居只林麓我今避



世無桃源胸襟結轉多煩寃佳處相約結鄰佳天上行  
雲聞此言

田家朝望

鄉居常早起耐冷聳吟肩曠野開新霽平林入遠天煙  
青溪上屋霜白渡頭船隔岸聞人語驚禽散水田

暫歸老屋適岳蓉村

昭遠

自諸暨歸夜飲齋中

鹿門煙樹鬱蒼蒼重掃盧鴻舊草堂底事全家猶作客  
依然遊子暫還鄉雨餘庭草含春意雪後山梅落古香  
閒立溪頭看流水一場小劫送紅羊

擾攘風塵話舊盟幢幢燭影夜窗明世多憂患珍杯酒

香雪齋詩鈔

卷一

三

人到流離惜友生歸里淵明空乞食感時杜牧漫談兵  
綠簑青笠安排定相與田園樂耦耕

鄉居見舊養黃犬感賦

傳書非洛下相見一銷魂不料艱難日來酬養恩當  
風眠竹徑得月吠花村今夜青溪上何人為守門

哀老尼

并序

尼字月峰住西溪慈雲寺今年隨予眷避寇鄉  
居二月八日病卒年七十八

日光蕩虛壁寒飈颭以催嗟嗟就槁木入爨為飛灰桐  
棺殮倉卒權寄荒村隈黃茅編作櫛聊免風雨摧殘蔬



翦盈把濁酒斟一杯小橋流水邊招爾孤魂來百年感  
世事已過皆塵埃雙淚不能忍自抱中心哀  
變端起肘腋黑夜飛狼烽青溪彈丸地草莽來伏戎民  
廬千萬間燬棄如飛蓬恃強肆劫掠囊篋皆一空况此  
三春日徹骨仍寒風窮鱗泣失水小鳥傷驚弓何爾空  
門人乃亦墮劫中

草木具生意得霜遂遽凋抱質非松柏相保無崇朝人  
生數修短權豈蒼倉操金石壽世物不耐人鐫雕憂懼  
擾精魄元氣因之搖可憐黃河魚輒自煎其膏罡風起  
天末怨水流滔滔徘徊北邱下白骨沈蓬蒿竊恐長眠  
者未必皆二毛殘骸已委棄冤痛何時消世亂輕生死  
性命抵一毫衽席得正命去矣辭塵囂

廢井

輓轡中斷息波瀾漠漠苔花上石欄一樣漢宮寥落後  
碧梧秋雨十分寒

比目雙魚悄不眠無多紅淚泣秋煙遺文蝕盡相思蹟  
訪古空尋綠玉瓢

鄉人前歲發井得綠  
磚有雙魚文誤碎之

對酒歌

君不見銀潢倒捲黃河流千古萬古無時休又不見赤  
鳥東上蟾西下旋轉雙輪變晝夜白楊秋老西風急月



黑狐狸作人立王侯將相皆塵埃惟見荒涼一片青山  
色悠悠蒼穹浮雲在空側身四望悲來填胸學仙難學  
彭篋壽成佛恐成靈運後乾坤無事娛心懷七尺昂藏  
一杯酒前招陶靖節後攜劉伯倫安得二人與我常相  
親燭花翦盡天將曙唾壺擊斷珊瑚樹

擬古

黃雲西北來白日倏以匿登高縱遠望川甸黯無色窮  
冬霜雪寒浮華斂羣植旦夕春風吹予心轉淒惻哀猿  
擇樹投驚鳥避人集悠悠羈旅身欲歸不可得撫劍起  
悲歌氣短繼之位

香雪齋詩鈔

卷一

三

驅車出東郭荒塚何纍纍寒氣莽叢薄怪木啼饑鴟草  
中暴露骨剝落無人知狼虎夜深出銜之甘如飴物性  
判靈蠢同荷皇天慈世事忽遷變顛倒憑所施郊原徧  
荆棘刺足痛切肌死者長已矣存者今瘡痍

春晴

春風扇平皋草痕醒微綠眷此朝日光瞳矐出高木開  
窗臨小溪兀坐展書讀好鳥三兩聲隔林破幽獨餘芳  
散野花濃翠積叢竹僻徑無人來蕭然遠塵俗

見桃花

分付東風護好春休吹紅雨下溪濱見時怕有漁郎誤



當作仙源告世人

申江客感

家具無多載一篷且來海上息征鴻候潮沙蜃朝吹雨  
拜浪江豚夜報風萬戶魚鹽開利藪雙輪雷火走夷瞳  
汗明知遇於今少誰為鹽車哭路窮

收拾愁懷付濁醪貓頭筍嫩配鶯桃世當離亂生猶幸  
地近風濤夢亦豪賦別江淹餘彩筆依人王粲尚青袍  
危樓醉倚看星象箕斗芒寒夜氣高

夷人火輪船歌

怒雷出地飛江濤馮夷奔走河伯逃瞥見身輕一鳥過

香雪齋詩鈔

卷一

五

誰知萬斛長虹搖

杜詩蕩蕩萬斛  
船影若搖白虹

常山蛇勢接首尾緣

邊櫂柁撐岩堯髻彤繡桷耀金碧廊腰迴縵簷牙高空

中樓閣駕妖蜃水面宮殿開神蛟轟然中流植一柱精

瑩鍊出銅山膏熅炭內燔結陰火九泉下燭陽冰消倒

噴烈燉捲天黑煽動地軸如車縲雙輪激海海水立力

回東逝流滔滔巨幹崢嶸伏波製大櫓旋舞虎彌操烈

若商辛試炮烙輕於列子乘風尻初疑矇矓倚赤壁飛

空一炬周郎燒又若洞庭角水戰輪舟倏忽來揚公風

雲變化魚腹陣坎離既濟羲經爻就中機巧杳莫測兩

耳但覺聲喧囂仿佛搏桑出朝日雜以鉦鼓城頭鼓椎



牛聚功起檣木長風浩浩吹旌旄高緹倚空作梯骨縱  
橫百級千繩交跳梁小鬼足最捷上下絡繹同援猱徑  
寸圓靈握水鏡隻眼照見千里遙我思振衣一登眺煙  
痕九點青可招或有羣真攬衣袂羽車華蓋紛相邀前  
驅飛廉後列缺踢翻瀛海鞭六鰲破浪空存萬里想望  
洋轉覺中心忉沙棠之舟木蘭楫更有赤馬吳江舫鴻  
毛不得假風便邪許幾費牽挽勞般倖王爾擅妙製未  
聞門捷誇雄豪 中朝弗貴淫巧技肯與鬼斧爭蟲雕  
方今西人縱就撫尚擁水怪興花妖誰具屠鯨好身手  
鐵弩射落錢王潮南海明珠越裳雉鷲慄聲教來宗朝  
香雪齋詩鈔

卷一

五

嗚呼萬國皆宗朝海航任爾常嬉遨

將進酒一章春盡日答同人飲錢

羣仙錢春開玉堂東君沈醉翻霞觴勢若銀河瀉平地  
化為萬斛葡萄香銅壺亂點更籌急熊白駝峯翠釜泣  
玉兔無光蠟鳳飛春痕濃沁屏山濕美人十五能吳謳  
絞珠迸落朱筥篋曲終更進酒一杓勸君盡洗胸中愁  
醱醖壓架香濛濛銀絲籠絡櫻桃紅畫樓夢醒柳鶯惱  
九十韶光容易老滄瀆城邊芳事多春申浦上風不波  
人生及時貴行樂有酒不飲將奈何將進酒歌愈激座  
中多半江南客明朝珍重上征輪他日相逢不是春



北渡別申江諸好

干戈徧地賦行行才息南轅又北征已到途窮孤注重  
自無親在一身輕屨屨炊罷悲夫婦斗粟春殘愧弟兄  
下令不須頻逐客扁舟明日去江城  
不向蓬廬卧布衣浪遊原與素心違也知白水盟難負  
能買青山我便歸一夕驪歌從此遠他時鯉信莫教稀  
青溪鷗鷺如相遇為問狂奴舊釣磯

別內

此行非得已况爾病多時勉視嬌兒女莫為無益悲

吳淞口弔陳忠愍公

香雪齋詩鈔

卷一

三

妖烽煽焰燭天紫呼嘯鬼聲白晝起颺輪快若并州刀  
直剪吳淞半江水公時移節來江南大勢聚米軍前談

敵人畏公謂公虎

夷人云從千里鏡中照公為黑虎

虎目視敵光眈眈

鯨魚跋浪滄溟湧壓陣壞雲如墨重時危戰苦天地愁  
高坐層臺兀不動援師已絕公掣肘公怒張鬣作虎吼

見危授命真男兒北望涕零九頓首一星芒角墮軍門  
六射鬚眉成木偶生竭臣心死報國遺骸七日蘆中匿

僧廬函骨面如生猶若揮刀呼殺賊朝廷下詔褒公

忠當時誰與公心同顧此公魔小醜耳公在豈獨全吳

淞可惜當時惟一公



曉發

半棧殘月墮高柳風挾檣鳥向北走耳中但受波濤聲  
片帆已出吳淞口我時襍被眠舵樓殘夢尚逐回潮流  
忽然噴作滿船水海天春暖魚龍浮朝暾欲上淡煙白  
翹首雲霄去咫尺試問中流擊楫人何如銀漢乘槎客

車行狼山下

山頭孤塔立亭亭四面嵐光接窈冥石洞亂雲埋虎穴  
海門飛雨挾龍腥沙含澗水痕多黑草受車輪色不青  
聞說更名從宋代荒林繫馬覓殘銘

雒臯水繪園

香雪齋詩鈔

卷一

三

繁華已逝水無言絃管聲希野鳥喧看竹不來王子敬  
風塵零落辟疆園

依舊垂楊拂面青天涯我亦是浮萍戰雲到處濃於墨

誰更題詩贈敬亭

巢民贈柳敬亭詩云憶昔孤軍鄂渚秋武昌城外陣雲愁如今衰白誰相

問獨對西風哭故侯

晤曉村從兄鐘於秦郵糧臺夜宿其行館中

背水新屯細柳營人煙莽莽接重城客中不意驚初見  
亂後相逢慶再生雲拂牙旂開霽色風傳畫角帶邊聲  
枕戈領畧征夫味轉覺聯牀夢不成

廿載邗江賦宦遊得參戎馬亦風流營巢拮据同梁燕



轉饗勤勞仗木牛誰道從軍須殺賊也思投筆博封侯  
戟門月色明於晝夾道紅燈聽唱籌

小紀寓舍晤徐小舟文

聯科賦贈

剪燭西窗雨乍收一尊相對話綢繆風塵見我猶青眼  
淮海留人到白頭小市盤殮兵後儉故鄉邱壑夢中遊  
行裝如此君休笑蘇季年來賸敝裘

吐鐵

桃花水落江天空塘脚沙痕漲虛白漁人解網正及時  
不需苓箬需片席席端一角引以繩投入波中不盈尺  
坐待撲鼻腥風吹不絕鮫珠延絡繹隨手拾得滿筠籠

香雪齋詩鈔

卷一

三

轉販半皆出海舶故鄉鱸膾遠莫致且食蛤蜊供笑劇  
往往有酒愁無般藉爾客窗佐杯核拈來似著鋒棱校  
咀去殊多鹽昔昔梅雨流香潤作鹹麥風扇暖凝成腊  
亦名梅螺麥螺柔脂半綻蟹抱黃纖尾曲包螺隱碧口非毒蟻

沙常含背較盤蝸屋尤窄無目應依水母居有舌欲為

西施惜

車螯名

淮人每與螺同稱

兩淮呼為泥螺

爾雅未經魚並

釋憶昨佳製來維揚法以糖霜漉膏液封入小口烏泥

瓶不數齊王千雞跖沈浸穠郁醞釀深腥腐終嫌滯胸  
膈今朝下箸味轉真熊蛤那容判肥瘠得酒亦覺醉如

泥入饌迥殊華附石古來名物各肖形烏有吐綬魚吐



墨卽論海錯尤紛繁石鏡江瑤最藉藉章鋸馬甲兼馬  
刀取義皆從鐵類借怪爾么麼名特奇笑我竟成來嚼  
鐵或者風沙煮海成槌碎洪爐向波擲日沐月浴蠕蠕  
生色味至今不變易體物難窮水族微拈毫自愧海蠡  
側祇合頓頓恣飽餐從此肝腸盡鐵積

客中漫興

出門自笑客何能酒後狂歌對一燈愁陣來如潮有信  
世情亂似夢無憑未逢寶劍空思俠得占名山惜讓僧  
擬駕浮槎訪牛斗長天河漢正清激

一劫昆明半化灰天風吹我渡江來勞勞白日旋牛磨

香雪齋詩鈔

卷一

无

寂寂黃金市駿臺地僻倘能逃殺運時艱應是鍊人才  
淮陰尚有垂憐者失路王孫莫自哀

得穩眠餐便是家不知身世已天涯變來面目踰淮橘  
抹倒文章墮溷花小隱合栽陶令菊閒居未種邵平瓜  
一椽許借梁鴻住門外溪光似若耶

莫問傳家舊釣竿浮沈人海嘆儒冠但謀衣食生何補  
能顧妻孥事已難鄉國音書隨雁斷海天詩思得秋寬  
囊中綠綺知音少靜夜焚香獨自彈

烈士行

短衣匹馬去鄉里欲走天涯覓知己知己恩重頭顱輕



割贈只同春蔓菁專諸聶政不可作後世論交半輕薄  
獻編贈紉紛紛來一諾千金安在哉囊中匕首不盈尺  
倒掣長虹貫天白試剖區區一寸腸寒芒彼此凝秋霜  
酒酣帶月出門去滿眼黃沙不知處君不見水聲鳴咽  
豫讓橋西風刮面森于刀

少年行

少年不讀書朝騎赭白馬暮逐油碧車少年不學劍朝  
解金錯刀暮醉銀光宴湖干甲第連雲起父兄執戟明  
光裏九衢馳騁生光儀一笑青雲取金紫論才頗惜廉  
將軍好士卻慕平原君長安道上侈結客揮斥黃金與  
香雪齋詩鈔

卷一

三

白壁歸來簾幕捲香雨燈前獨鹿蔗竿舞紅閨新繡錦  
障泥明日高臺去鬥雞

秋懷

搖碎梧桐月半窗雁聲南去尚成雙夢魂不怕兵戈惡  
一夜西風已渡江

見月有感

冰輪捧出五雲邊為問今宵幾處圓夢裏池塘秋似水  
笠篔簹居鄉閨中燈火夜如年

丙子居申江

一般離恨難瞞爾千

里相思各在天祇有長眠人寂寞清光照不到重泉

先慈

見背十二年矣客冬又奉先君之諱



寫懷

暴風無靜樹驚流無定萍白衣棄鄉國塵面非舊形出  
門何所見大海奔濤青渺然身一粟舟芥浮蒼溟呼吸  
皆飛沫更挾魚龍腥履常意或歎涉險心轉冥敢以鯁  
生命上瀆皇天靈北登海陵岸回望煙星星離獸日奔  
竄白骨平郊垆

微風拂庭樹明月盈階墀攬衣起中夜滅燭哦新詩筋  
以入骨細毛以求疵吹冥搜路中斷一縷心神追元氣  
當護惜琢削無或遺行年未老大兩髯飄飄絲形影豈  
解戀曷有須臾離詰朝謝之去轉睫還相隨虛堂出光

香雪齋詩鈔

卷一

三

怪恐惹精靈窺

都天廟

滿庭荒草碧蕭蕭日射紅牆淡欲消古殿風高雙燕語  
虛堂晝暝百靈朝溪流聲應江潮壯樹禿痕留劫火燒  
擬脫塵鞮修淨業焚香終日坐僧寮

北極宮夜觀盂蘭盆會

星蟾夜泣碧秋老十萬紅燈浴露草大地吹遍醍醐香  
金童手挈銀瓶倒花幡寶蓋飄空中白旃檀結煙濛濛  
慈航苦海渡不得匹練駕作長橋虹風旋紙灰半天起  
鐘磬聲沈碧燄死樓臺七寶開莊嚴老衲蒲團一彈指



似聞此法出面然空中餓鬼來垂涎為乞楊枝一滴水  
灑徧白骨恆河邊果爾婆心亦淒苦楚些招來魂幾許  
薜衣蘿帶寂無聲鈴舌郎當隔煙語誰樓畫鼓三過過  
爐篆餘香散蓮座草蟲絮訴寺門寒芙蓉悄抱殘紅卧  
中秋夜雨

畫梅自題

茵茵香凋碧簾涼一樽孤負好秋光嫦娥自掩雲屏卧  
生恐相逢各斷腸

我昨五月浮海槎玉笛吹落千梅花竭來羈旅百無事  
又看黃菊生圓葩頗聞是鄉說種樹厥土不宜桑與麻

香雪齋詩鈔

卷一

三

矧茲水邊籬落下安得疏影來橫斜拈毫時復發清興  
臨池潑墨如塗鴉腕底春風起蓬勃胸中老幹生杈柯  
貌出元圃姑射態瓊瑤玉佩無纖瑕大珠落盤素萼圻  
古錢點背蒼苔加灞橋詩客冷覓白孤山處士依為家  
徑欲凌風學輕舉吐納冰雪餐瑤華置身高處寒亦得  
桃源避世何足誇隴頭驛使倘可遇一枝更寄天之涯

畫松自題

畢宏韋偃今不見奈此鷺溪好東絹書生腕力千鈞強  
放筆空中為直幹取勢先在孤根盤鐵骨出鑪百回鍊  
毫端飄若風雨生頂門萬鍼轟葱蒨縱橫蛇腹皺霜皮



剝落龜紋落苔片  
筵前舞妓小垂手  
閣上將軍大羽箭  
脫手張向雪壁看  
陡結繁陰滿深院  
惜少方袍廣袖人  
倚杖臨流一撫翫  
頻年夢入金牛湖  
萬株嶺上聽風戰  
我枕萬松嶺  
影搖碎月排空山  
聲挾寒濤落幽澗  
鍼砭俗耳  
箏琶音竟體珊瑚  
仙骨換醒來悵失  
蒼髯翁却向圖中  
識真面  
旁觀莫道神不完  
差勝焦桐斲半段  
敲牀疑有  
松子聲起煮龍團  
飽清嘍

偕徐香谷

鳳詒

游龍王廟復之三元宮

終朝羈委巷  
欲隘心不怡  
西鄰徐孺子  
邀我開雙眉  
出門不半里  
漸與人煙離  
平堤雜沙石  
衰草青黃披  
獨木橫  
略約崛強枯椿支  
游魚聚其下  
尺水環繞之  
楓重醉  
霜色柳老眠  
髡枝秋陽樓  
樹杪一二烏啼  
飢招提  
望未及聞鐘  
先已知彷彿  
投齋客飯後  
嗟來遲

香雪齋詩鈔

卷一

三

僧廬枕碧溪  
波縠當門縷  
木佛守枯龕  
鑪香冷還透  
黃面病瞿曇  
導客出中雷  
西隅地數弓  
鑿徑得小園  
籬根編棘  
荆果實垂橘  
柚亂葉堆牆  
坳古苔悶泉  
竇叢蔞舒  
秋英五色迷  
錦繡雞冠勢  
更雄翹立金  
距門中擁雁  
來紅高挺一  
枝瘦面圃屋  
三椽清幽出  
新構窗楹向  
陽明几榻絕  
塵逗史公大  
手筆瞻仰神  
聳秀懸史文正公遺墨石刻  
惡札書其旁  
疥壁忘粗陋  
活火燃松枝  
漸聽瓶笙奏  
淪茗



息塵勞跣趺永清晝

游興如餘霞向晚轉爛漫隔溪老僧家敲門復相喚高  
屋初建瓴飛動切霄漢丁丁斧鑿聲梓手云未斷騁懷  
喜清曠觸目叢悲惋江南十萬戶巨室耀輪奐慘遭狼  
虎居摧拉率過半牆垣壞作堤榱棟伐供爨紺宇琳宮  
間榛莽狐狸竄此間洵樂土梵域皆壯觀計日將落成  
耳目快一煥願乞空王靈慧劍斬絲亂

西北有高樓樓外半雲水出門一以眺不知幾何里遠  
岸無片林長天淨如紙風颿紛往來出沒煙光裏野航  
三兩人攜擔歸城市船頭赤脚童一篙撐沙背荒蘆偶

香雪齋詩鈔

卷一

三五

動搖老鷗拍不止渺渺馬遠神淡淡倪迂旨尺幅翻瀟  
湘落筆恐難似轉惜樓中居繚垣礙瞻視試叩意云何  
答以防奸宄月好閉門推樓迥背山起解人不易得此  
曹應爾爾

重泊秦郵

淮海風流悵渺然尚書孤櫂倚寒煙蕭蕭殘柳秋風裏  
又隔人間二百年

漁洋高郵雨泊詩云風流不  
見秦淮海寂寞人間五百年

九日同人奎星閣登高

客裏孤懷鬱不開仲宣樓上約同來已無兄弟登高處  
空負乾坤作賦才布地黃花經雨瘦過江白雁叫風哀



純鱸思遠霜螯美且醉飄零濁酒杯

夜坐

風引燭枝淚波生簾押紋客愁蟲裏月秋氣雁邊雲看  
劍摩新鏞温經辨古文幽懷何處寄杞菊正清芬

朝望

雨後溪光一片明遙看初日挂銅鉦平洲樹到天邊見  
別浦帆如地上行雲結魚鱗成異彩風兜鴉陣帶回聲  
五湖三卯多秋水遲我扁舟泛曉晴

經市後小村

敗葦覆蒼土築屋屋後垂楊繫黃犢經霜豆筴青更肥

香雪齋詩鈔

卷一

五

尚有餘花冒籬曲鹿場一片當門開高疊黃雲及樹腹  
杵臼聲中稚子喧糝糠堆裏雞羣啄吾鄉收穫須初冬  
江北紅蓮較早熟更聞比歲皆豐登十月已完太倉粟  
魚蝦爛賤蔬菜饒小甕茅柴酒新漉桃源洞口煙雲多  
得住此鄉亦云福前墟彌望篠笳深一縷炊煙透寒綠

懷同社諸子

秋菊落素英幽蘭紉佩纓吾黨二三子結欵在中腸道

心析精理文府雕圭璋吳質性誠慤石門吳桐村學後蔣詒才

清狂武康蔣心若廷鏡盧謙博典籍同邑盧小菴景昌旂鼓雙丁張湖州

丁海秋翔高暨其姓友洛爾青翩翩玉楮生鬚鬢寢老蒼嘉興岳昔為



同林鳥今被驚弓鷃睽違不千里豈曰道阻長南行斷  
舟楫北渚乏河梁淮南有桂樹得氣敷芬芳賦詩步招  
隱有願不得償感此情淒惻獨立望故鄉夢中忽邂逅  
告我言不詳西風起天末梁月含清光梧桐欲就爨繳  
烈悲中郎秀水蔡

懷西溪諸子

無已善畫兼善書

陳秋泉

書法不讓張公子

張樸

驥子

清閒更善碁

陳竹君

一局縱橫畫素紙草堂卻對西溪

開相隔我家一條水暇日談詩偶過從畫筆碁奩滿湘  
几尚嫌對酒意不歡東坡飲止三蕉耳就中張旭興最

香雪齋詩鈔

卷一

五

豪

杏

醉後煙雲生十指醉狂醒聖各有姿舉座揮毫門

精技一時繪圖索句人紛紛二老高懷得風旨

張蓉鏡

丈有詩

胡簡香文

歸途徑叩精藍門

普淨

夜半山僧忽驚起生

綃手寫梅花林腕底化工亂驅使

栗菴僧徒

嗚呼神仙

富貴亦等閒當與此曹此樂相終始十年朋舊今何存

亂後移家各轉徙夜雨江南落葉黃秋風海上迴瀾紫

諸子半居鄉

北征我逐孤鴻來滿眼蘆花作窮士墟畔

行沽暮典裘街頭賣字朝趨市無端清淚流盈衿為有

前游在故里不知秉燭羗村時此後相逢更何似臯蘭

零落芙蓉殘煙水蒼茫斷雙鯉詩成有感紛填臆滿幅



愁雲難逼視

香雪齋詩鈔

卷一

三



香雪齋詩鈔卷二

桐鄉嚴 鈞迪周

雜詠

照乘珠非寶躍冶金非祥志士具寸抱韜晦不見長橫  
几覽史冊傳者難斗量草木不俱萎一二憑文章少年  
侈聲譽騰蹕凌飛黃橫翔與捷出中道多憂傷凡鐵何  
足惜缺折乃干將座中赤鸚鵡竟為禰衡殃巍然廊廟  
器骨重寒無芒

夷齊歌采薇巢父樂洗耳世運當昇平棄之如敝屣神  
聖經營勞方有閒山水咄哉高尚士終在九州裏淵明  
香雪齋詩鈔 卷二 一

心最深結想寓元理仙源桃花多去此幾何里至今避  
亂人翹首空相歧

太極本無極世儒衍勦說乾坤形渾然卻在空虛結成  
者得主名已毀等冰雪造化小兒身日鍊洪鑪鐵千萬  
億載後恐爾亦消滅俛仰何為真榮辱差一瞥游息遽  
廬中我將參莊列

烈士無二衷張口露肝膽贈人酒一罇滴滴出心窩朝  
起望顏色眉宇鬱悲慘為言世道薄美譽紛延攬情傾  
為所窺著者倏已揜反令蝨蝨微妄欲將山撼疑謗中  
於微論心愧未澹交淺而言深千古有餘感



繁霜結為霰澤國增重陰佳人怨修阻瞻望愁淫枯  
魚就尺水驚鳥藏密林慘慘孤猿叫唧唧微蛩吟客來  
我眉下贈我綠綺琴欲彈復斂手傾聽誰知音芳華易  
徂謝憂患因之侵或恐變徵調不復和平心白雲滿山  
谷徒勞魂夢尋

羲和鞭六龍萬古無時了鄧林狂奔者探杖徒紛擾大  
禹勤惜陰姬公坐待曉兩間功業多遺棄復不少夏蟲  
難語冰蟪蛄豈知老翩翩媚少年掩鏡容旋槁行樂微  
長生古人言之早何以據要津先我歸蓬葆博奕猶為  
賢朝夕期聞道黃金擲虛牝言念心如擣

香雪齋詩鈔

卷二

二

盆中古松樹鬱鬱何惹惹根剔鷹筋瘦枝附牛毛鬆杞  
柳等戕賊屈曲憑人工具形本天矯淺壤難為容風雲  
失咫尺依倚誰適從坐令橐駝輩玩之股掌中鱗甲深  
自惜何日方成龍泰山有舊侶聞受秦皇封

陳平噉糠覈并無惡草具何曾日萬錢尚無下箸處雞  
豚至味存屢進反不御水陸名新奇耳食爭阿附味劣  
聲價尊長吞無一吐究其好惡心取舍皆違素寒敲仲  
淹齋暖噉懶殘羊孺子况因人辛苦自含茹

豐鐘應商令大地零纖枯鷲禽出攫食側翅千盤紆窟  
中伏狡兔一落遭剝膚元林餘陰氣竄避多饑烏毛羽



斂蕭瑟縮項不敢呼誰家遊俠子手挾金僕姑怒馬方  
獨出仰面彎圓弧可憐好頭角血雨飛平蕪等為口腹  
計安用相吞屠

乾龍夜雨粟書契聿兆興作述更相望傳此無盡燈媯  
廷十六字本無理學稱後人廣訓詁私意為損增新進  
鮮依據百出紛師承詆排別門戶標謗恣驕矜曩哲如  
可作欲辨嗟何能揜耳意忽忽舉世喧蛙蠅

長安盛冠蓋廣陌朱輪交有客惜衰朽悵望觚棱高下  
車別故舊長揖歸蓬蒿田園雜蕪穢庭戶寒蕭條誰耐  
桑榆景永聽妻孥號出門就熟路南嶽拚貽嘲知交半

香雪齋詩鈔

卷二

三

宿草憑軾皆英髦昔時金絡馬駛賊氣不驕朝天白玉  
簪髮短籠難牢數問夜何其竊意鐘漏遙形骸與為役  
竭蹶殉塵勞羨彼田舍翁春酒魚羊羔

瓊樓結桂陰一水環銀渚仙人五銖裳纖手理機杼年  
華疾似梭留之不肯與辛苦何日償掩淚默無語錦段  
爛雲霞織就知幾許人間花樣繁欲售還重貲庚戌玉  
繩斜渺渺雲駟阻青天碧海心永夜獨延伫

香谷齋中古琴

朝入徐陵室地僻軒窗幽庭後饒梧竹疎籟鳴高秋探  
囊出古器靜對云消憂金徽受潤緩玉軫辭塵浮斧斤久



滅迹蛇腹含文髮側首隱一穴  
翰通此息游胡牀學箕  
坐橫置雙膝頭恍惚挾我去  
大海風濤舟箏琶媚俗耳  
誰與師涓謀勸君惜手不忍聞  
方為修勿使素蘊宣致  
被朱絲羞更看藉絃物色黯  
孤子鈞還君不忍鼓涕泗  
浪浪流

題畫

寒意莽林麓梅花不可攀  
煙雲隔前路幽澗響潺潺  
我欲騎黃鶴逋仙亭下還  
劃然起孤嘯明月滿空山

蟹

秋風絕憶爛溪隈  
斷口茅亭四面開  
昏夜老漁寒不寐

香雪齋詩鈔

卷二

四

一燈紅出葦花來

出吾鄉爛溪者佳

白雁

長天無片影嘹唳起哀音  
秋水同時至月明何處尋  
愁催詩客髻神往玉人琴  
嗟爾隨陽性形容漸不禁

畫松為小舟丈壽

此材不合埋空山  
舊侶幾輩參朝班  
盤空奇氣自鬱勃  
胡髯略點霜雪斑  
廿年移置江淮上  
天風高捲濤聲壯  
磊砢卻具高士形  
支離乃成壽者相  
不寫梅花肖放翁  
圖形今作蒼髯公  
欲將千丈長輿格  
敬代仙家綠玉筇

登秦郵大隄



上遊諸澗盡朝宗  
新漲桃花又幾重  
萬頃橫流通汴泗  
一隄立壁捍魚龍  
城頭雲散連檣見  
甕裏天低比屋封  
三十六陂煙雨漫  
綠波芳草倍愁儂

借朱承甫

思緒

周吉甫

慶昌

登文游臺拜蘇孫秦

王四先生粟主

高臺攜酒日斜時  
前輩風流想見之一代  
畫圖名士筆

李伯時有文游臺圖

千秋姓氏黨人碑  
吳興墨妙同遺構

孫莘老守湖州

坡公為作墨妙亭記

淮海英靈贖廢祠  
窗外湖光鄰甍社  
弄珠更

約夜歸遲

泊露筋祠

香雪齋詩鈔

卷二

五

垂楊幾樹靜棲鴉  
沙澹風多繫客槎  
夜枕不聞蟲聚市  
滿湖涼月浸荷花

海門客舍同人溪頭步月

繁星撒沙雲捲空  
老蟾高踞青天中  
振衣一笑出門去

桂花露重霏濛濛  
幽徑行吟避街市  
板橋繞出疎楊裏

沿溪回望朱樓鐙  
人語依稀隔煙水  
驚起沙禽作先導

深巷犬聲猛於豹  
搖碎蘋花滿路香  
三兩漁人理歸櫂

年年看月青溪頭

予家浙西之青溪

幾人扶醉登南樓  
銅壺漏

急玉繩轉冰輪低  
挂珠簾鉤紅燭高  
燒剔金穗喚醒海

棠梢無睡不知天上  
高寒愁那識人間  
離別事一夕烽



煙動鄉園江南飛花落江北依然八萬二千戶照成滿  
目淒涼色竭來奔走東海濱撲面五斗堆黃塵今宵見  
月差快意清游況遇同心人一杵蒲牢忽飛度倚樹徘  
徊不忍去蟲聲偏是得秋多啼入新篁最深處

越夕復與同人步月過野廟不入

今宵月比昨宵好今宵游比昨宵早蕉衫綵縹芒鞋輕  
竟體清涼踏露草烏鵲接翅南向飛天宇寥廓星光稀  
西風振木木葉脫孤燈淡露林間扉轉過溪隈得蕭寺  
知是尋常舊遊地紅泥半蝕蒼苔痕照見蝸牛壁上字  
寺門深鎖松篁幽滿階苔藻交橫流鬢蘇當日承天游  
香雪齋詩鈔

卷二

六

此景依稀相似不仙客風流誰繼起更惜懷民今往矣  
當年淪茗話元關洗滌塵心淨於水古人今人不相見  
古月今月不更變今人古月卻相逢見月如見古人面  
紉如官鼓搗三更歸途仍繞沙隄行昂頭天外起長嘯  
一羣鸞鶴空中鳴

海門客感

靜掩風簾讀楚騷蕭蕭紅葉下平臯花如結友無嫌淡

山可留人不在高

邑有師山高僅數丈

名士虛聲慙畫餅重陽雅

興罷題餠邇來鏡海樓頭住

廟樓名

輸與元龍百尺豪

東海為田久種桑百年庶富擅江鄉木棉綻雪千場白



隴麥翻雲萬頃黃常使閭閻稱樂土未須城郭重邊防  
海門無城梨花新釀饒風味日向壚頭醉夕陽

夢魂驚醒五更潮可是馮夷氣未消架海蛟鼉乘夜出  
摩天鷹隼得秋驕霜寒澤國悲笳動風送樓船大纛飄  
聞道黃龍新設戍幾人投筆學班超  
各港口江防甚密新到長龍礮船數

十號

目斷鄉關捷報傳隔江烽火尚連天文章每召飢寒禍  
患難能移聚散權此去成都惟剩壁即歸陽羨已無田  
誰憐海上飄蓬客吟瘦西風落雁邊

贈歌者朱素雲

香雪齋詩鈔

卷二

七

珠箔銀燈笑語闌酒邊涼思動輕絃琵琶曲賤黃金貴  
莫向天涯著意彈

秋感

感事書常廢悲秋病易成艱難知世態貧賤損才名日  
冷林容肅霜乾水氣清風塵愧鷓鴣頭角自崢嶸

夜泊雒臯

繫纜江城外枯樁落漲痕疏鐘煙際斷短燭雨前昏裝  
薄餘書卷愁多付酒罇百年羈旅感心事總難論

冒巢民先生祠

壇坵東南浩蕩開東林漫惹黨人猜天生濁世佳公子



僅賦昇平不見才

開府揚州半壁成春燈謎語幾人評風流抗手陳吳輩  
豔絕桃花扇上名

扶風帳後盡傾城扇貼梅花製亦精試比榆樓未月上  
合將小宛侍先生

吾鄉童佛菴祀厲樊榭徵君以姬人朱月上粟主從祀榆樓在湖州乃徵

君迎月上處今名月上樓

老樸荒巢兩鬢絲愛才還似鄭當時過江名士今如許  
訴與斜陽總不知

十月十五為先君諱日舟中誌哀

卧病荒村漸不支東南掃蕩望王師他時家祭毋忘告

香雪齋詩鈔

卷二

八

腸斷臨危務觀詩

回首家園魂暗銷白楊衰草冷蕭蕭蓬窗一把孤兒淚  
流到墳頭當酒澆

夜泊汊河

啼鳥聲太苦昏夜覓枝依風勢急於弩霜寒深入幃貧  
時知累重客裏覺身微不寐頻搔首中年鬢已稀

重泊雒臯

射雉城邊路重來泊短檣樓臺隨岸折星斗落波搖樹  
黑漁家屋燈紅酒市橋勞生何日息鄉夢逐回潮

將返海門雨泊東塍



飛鳴金鐵號天風輕舟欹側洪流中篙工蜩縮客不發  
跳珠聲急喧烏篷灘頭老卒行復止敗角酸鳴破柝死  
夢回酒醒情鬱陶布被堆懷薄於紙去歲扁舟渡江北  
繫纜此間夜方黑菰蒲兩岸作雨聲一笑開門好月色  
兩年漂轉海陵道重向雪泥認鷓鴣瓜山川風景尚不殊  
只恐客顏比前老男兒在世當自強忍令毛髮摧風霜  
磨牛步步踏陳跡三升芻豆充飢腸滿紙牢愁兩行淚  
陳阮豈甘作書記黑山剽殺遍東南留得管城立錐地  
崇川之東大海隅湧現紫鳳嬉天吳瀾迴漲落出沙甸  
蛟人蠻戶誇膏腴生平夢想幾曾到忽向煙波抒清嘯  
烏薄雲上迴帆搥鼓聲鏖鏖滿宇晴光豁新爽

通州訪張鏡江文

錄

留宿習氏園贈武林董又雪

惟

言尋張子野小住習家池雨過花猶怯風來竹預知  
茶煙縈塢細棋響出簾遲暫罷江都讀園林好共窺

由通州至海門車中書所見

香雪齋詩鈔

卷二

九



小雨能清陌上塵車輪破曉響  
麟青山最是多情物  
十里郵亭尚送人

茅屋開門繫短橈門前溪水曲  
通潮天然一幅雲林稿  
衰柳寒鴉獨木橋

枷板聲喧子婦忙田間晚稻亦  
登場生涯可以江南好  
秋老家園芋栗香

搖落芙蓉滿水隈平林敗葉已  
成堆黃花獨表凌寒色  
還向村娃鬢上開

喜晤故鄉陳仙海 方瀛

風雪荒村幾度尋旗亭無處賭  
豪吟生成狂瘦形原異

香雪齋詩鈔 卷二

歷過艱辛語自深東漢黨人稱  
郭泰南州記室重陳琳  
相逢漫唱思歸引安道年來已  
碎琴

贈仙海

慘綠年華著白身王孫寶玦黯  
風塵多情天地偏生劫  
無定文章最誤人作達但謀千  
日醉傭書難救一家貧  
不求仙佛求逃世何處桃源許  
問津

題友人師山紀事詩後

無端惱恨賦揚枝夢覺紅殘綠  
暗時豈為愁多方縱酒  
斷無情重不工詩半生同調陳  
無己一曲傷春杜牧之  
蘭茝飄零湘水濶空將瑤佩寄  
相思



題行乞圖

消盡不平氣成茲自在身窮途誰進食好事半求人蕭  
寺鐘聲冷朱門肉味陳流亡方滿眼我敢諱言貧

庭前鳥

庭前有鳥鵲託身最高枝朝出尾畢逋夕返羽差翅何  
來鄰家子伐樹供晨炊根斷巢亦覆盡為爨下資毛羽  
尚自愛翻作江湖思天涯多雨雪蒼蒼常苦飢荒原見  
枳棘何暇論高卑一枝得暫借聊免漂搖悲陰厓出岵  
謁努目眈眈窺夔蛇或解憐異類遂肆欺龍門桐百尺  
歷久聞就萎喬木苟可遷瘡口予安辭空桑經三宿詎  
香雪齋詩鈔

卷二

十一

不戀在茲重以防患故偏處懷危疑欲去復中止兩端  
方寸持疾風起夜半吹墮那及知行將謀他徙尚用摧  
殘為

題陳良齋明經

驥德照

渤海清門有賜書

君為勸海相公之後

高文典冊付相如一堂歌

嘯鼻比座三度功名博浪車曠野於今悲兕虎閉門何  
日注蟲魚自慚不及徐高士孤負陳蕃播令譽

將去海門仙海偕同鄉諸子金陵宗載之

德福置

酒錢行

彤雲慘淡月半明僮僕倚裝催啟程天寒夜永敝裘薄



當筵忽忽千觴傾吾鄉數子各偃蹇宗慤少年志已遠  
無端傾蓋東海頭彼此相勸加餐飯人生識字憂患始  
一劍何時報知己從來薄俗輕文章若箇交情託生死  
漿家餅肆聊藏身書記翩翩皆可人旗亭鬪飲每達旦  
灑陵小尉何敢賸搏沙聚散亦奇絕盡此今宵又長別  
出門四顧天宇低卻恐前途阻風雪我行公等且少留  
來日相思江上舟

揚州感舊篇

北風捲水水波涸赤燒連雲白楊落推蓬瞥見女牆來  
知向維揚城外泊維揚自昔繁華地聞說竹西盛歌吹

香雪齋詩鈔

卷二

煮海頻刊鹽鐵書采風爭寫煙花記一自曾盧出使軺  
慣將鍋子把金銷修成天上二分月裝點人間廿四橋  
樓臺歌舞昇平好看花更勝長安道北海樽開顧阿瑛  
南山絹裹王元寶蘊利從來釀禍胎馮夷煽燄過江來  
壬寅 縣中烏化爭飛去城外靴尖怕趲開江郎垂老才華  
盡只學張公書百忍金繒潛向契丹輸羅錦卻邀回紇  
允徵倖東南半壁安全多始保此甌完葫蘆粉本重描  
誤瓜種黃臺再摘難石城一夕驚鼙鼓癸丑 掃蕩鶯花十  
萬戶爾輩都成褚彥回此時誰學韓擒虎烽火相看二  
百里中隔一條衣帶水臨陣蕭娘舊有名談經祝媪真



無技 天子臨軒策上公輕車新拜未央宮聞說衛青  
重作將誰知魏絳又和戎餌敵謀成翻縱敵徧地瘡痍  
慘鋒鏑信有開門揖盜來那能抱石援人溺一場草穀  
打空空三月阿房火未終勢成岨虎愁雲黑殃到池魚  
毒斂紅家家痛哭曲江濱處處荆榛色不春海上燕歸  
巢樹木遼東鶴返失人民轉眼滄桑十年後昆明猶賸  
劫灰否靡蕪苑廢鬼吹簫瓦礫場寬僧賣酒風光空自  
思前度新城司理班春駐金迷紙醉竹枝詞光沈響絕  
蕪城賦漢使樓船駕水行耳邊風鶴已無聲江山會見  
仍如舊何日重令白骨生

香雪齋詩鈔

卷二

五

城烏行

城上烏啼何悲棲身不得樹一枝尚有荒堞能依之烏  
飛可千里烏生無幾年此間城郭久寂然盛時不見何  
用憐獨憐老烏將雛日黑夜鴟鴞來毀室蒼皇不肯中  
道捐辛苦銜雛破巢出烏復生烏今歸來江頭依舊城  
門開吁嗟當日驚飛去老烏於今不知處

江口大營

北府雄兵自昔聞要津扼處蟻防勤五營曉角開江霧  
萬竈寒煙結陣雲裘帶風高羊太傅樓船威鎮馬將軍

儲胥近日勞籌畫無事量沙唱夜分

時泰州設南  
北兩糧臺



渡江

長風促行客獵獵鳴相鳥輕舠挂片席激箭去須臾撲  
面山影小轟耳濤聲粗霧散天漸碧日上霞先朱薄采  
無社若試俗多鷗鳧四顧眇行檝彌覺予舟孤人生脫  
危機何往非坦途掬水洗雙眼飽覽江天圖

海陵客館除夕憶內子申江

風雪殘年客未歸心隨鴻雁向南飛黃羊空媚王孫竈  
紫鳳還栽稚子衣蕭瑟江關鄉信斷艱難道路世情非  
此生已定君平卜莫再金錢擲繡幃

癸亥元日

香雪齋詩鈔

卷二

十四

瞳矐旭日上闌干池館全消隔歲寒春色漸催花爛漫  
故鄉誰報竹平安三杯俗例屠蘇酒一笑先生首着盤  
省識正平懷刺意姓名未許俗人看予不出賀歲

讀梅村集

秣陵一曲淚先傾離黍歌殘愴舊京陶令集仍沿例訂  
杜陵史僅借詩成陳情空抱遺民牘倚醉愁聽老妓箏  
寂寞百年心事在天涯風雨哭侯嬴

贈靜悅僧 并序

卜姓吾郡世家子年六十餘遭寇喪家子身渡  
江披荆於海陵鹽宗廟越年遇予云將募資雲



游感贈此章

一龕枯坐髯毛斑為話飄零淚尚潛鋒鏑餘生無短褐  
英雄退步有名山趙州行脚思同往雪竇參禪恨未閒  
待了周妻何肉累團蕉相對證元關

悼亡

君年二九時始為吾家婦戊申堂前有兄嫂堂上有父母  
先意知承歡庭闈獨鍾愛侍奉未三年吾母遽見背庚戌  
視舅不殊姑自視不殊兒羹湯必精潔吾父常怡怡我  
時文興豪秋風輒鍛羽幾番羈毳歸下機仍笑語結襦  
計七年子女各生一體弱操作煩為我置窻室食指日

香雪齋詩鈔

卷二

十五

以繁家計日以短勸我奮功名父老勿再緩庚申秋七  
月賊氛來倉皇扶老並攜幼全家避之鄉篁溪鄉居苦湫

隘吾父又卧病晝夜侍湯藥勤勞出誠敬君適患腰疽

恨乏良醫療一潰不復收精血日消耗忽傳賊踪退王

師尅日至歸掃瓦礫場老屋仍棲止井竈方粗安吾父

疾已甚君心憂且悲祈禱忘食欲時維十月望白頭溘

然逝更遭兄弟喪韻山兄弟流淚滿襟袂靈櫬甫就厝賊

又紛紛來家具盡一舸重之筮溪隈逾年賊虜至騷擾

徧鄉曲潛身榛棘中傷肱不敢哭囊橐既搜括筐篋皆

毀棄賊去視積困狼藉僅在地家人幸無恙驚定尚失



色竈突斷炊煙不能作哺食夜與鄉人約黎明駕小艘  
微行出虎窟潛避春申江申江彈丸地華夷雜來往兩  
浙竄難多藉此為息壤維君外家人亦在申江住君以  
骨肉親相依諒非誤我時遭家衅枝栖那可得一妾及  
二女親攜赴江北我行將視塗君起理晨妝蓬首揮雙  
淚慰我休悽惶膝前小兒女我為郎善視略待風波平  
相偕返桑梓欲答語哽咽屬君心勿煩癰疽跡雖斂正  
氣須調元我行非得已分手真草草慙愧七尺軀妻兒  
仗人飽君言奩中物尚賸雙明珠黃金釵數股藏在紅  
羅襦縱乏十萬錢喫著豈遽盡依人不求人庶免人齒

香雪齋詩鈔

卷二

六

冷語次日將午送我出門閤定知回房後泣涕更漣如  
江北路非遙波濤卻浩汗假我一帆風直抵崇川岸

州通

吾兄久游宦

曉村兄

鄉信亦已賒逢人偵踪跡知在小紀

家小紀近吳陵復買吳陵權兄嫂喜相逢愁顏變歡笑

匆匆逆旅過堂堂歲月更別離逾一載未報全浙平三

月得君書自言體羸瘦望我返申江分勞撫穉幼江頭

鬼蜮多含沙伏陰禍敢拚池魚身投入城門火中宵感

幽夢見君解繡鞋先機得凶讖坐覺中情乖吾鄉李大

令松于役申江濱請附故人驥妻子載歸輪榴花開欲

殘李君方就道臨歧重叮嚀切屬迴帆早小紀屋一椽



不能展尺步準擬攜家來吳陵作流寓隆隆屈初伏終  
日盼團圞一鳩忽悲叫傾聽毛骨寒亭午來飛札到門  
駭僕從開閣甫數行失聲起長慟君狀我粗知君病我  
未見正待李君還重洗風塵面黃浦水土濁地窄居人  
多積氣成沴戾酷暑交漸磨死者日千計購棺無餘木  
料君積弱軀安禁此荼毒李君裝初發君病猶未久誰  
知李君至君已歸烏有歿於五月二十四日書到尚半月日得信  
視殮豈及待即此半月月中嘻笑皆成悔兒癡與女嬌何  
人加意看想見彌留時肝腸寸寸斷世亂軀命輕財絀  
親情薄鬚眉且奈何託身况閨閣憶君入吾門倏忽十

香靈齋詩鈔

卷二

七

六年名場屢蹭蹬辜君望眼穿凶喪繼患難愁眉開有  
幾膽裂心血枯死為異域鬼盈盈一江隔翦紙賦大招  
水生計微僅備雞黍供富貴我非歆頗領我豈屑後事  
不可知君身已永訣君貌素端莊初無天札相君性更  
和平喜怒不露狀我身縱不德豈妨君壽數誰使我二  
人中道不及顧天聽誠高遠家有祖若宗泉下設相遇  
煩君訴苦衷

李松卿大令

錫齡

送小兒女及先室錢孺人靈旒



歎息癡兒女爭嬉蠟鳳凰也經世憂患倍覺色懷涼縹  
帳含江雨麻衣結夏霜壁間遺掛在忍聽泣呼娘

書李陵書後

浚稽山下陣雲愁從此音容斷白頭未死焉知非報國  
即歸仍恐不封侯河梁攜手難為別蠶室傷心竟被收  
試看青宮巫蠱獄沈寃空自訟千秋

松林菴古松歌

之而夜鬥垂天虹波濤澎湃聲摩空松林庵中地咫尺  
鬱為萬丈靈虯宮到眼陡驚入深穴凝神審顧知為松  
偃蓋寒陰結煙霧鳴條古籟酣笙鐘斑斕裂出蚪蚪字

香雪齋詩鈔

卷二

六

磊砢堅積周秦銅孤根拔地只三尺莓苔僵卧頭則童  
腹上雙枝各倔強不肯直上于蒼穹一縱一橫兀相向  
延津寶劍分雌雄秋筋交盤細入骨愈佶屈處愈玲瓏  
牛毛蓬鬆鶴頸瘦旁生側挺皆附庸怪哉其高不出屋  
已若萬壑千岩重韋生放筆為直幹對此坐覺人無功  
我聞僧繇當年擅畫壁雙睛一點飛蒼龍中宵雷雨起  
搏擊或者失勢墮落紅塵中至今欲去不能去鱗鬣  
縮留其踪否則山林豈無一席之地何為粥魚茶版伏處  
相始終呵護惟憑象教力偃蹇不受秦皇封斂盡擎雲  
捧日勢養成際地蟠天容相傳此條六朝物曾逃百劫



雷火攻當日盤桓發清詠親見廣袖方袍翁齊東野語  
鮮考覈飽看自拓千秋胸何當結廬傍僧舍敲門來訪  
十八公

題仕女小幅

蘇氏迴文樣已稀十年辛苦織璇璣朱門羅綺渾閒事  
偏累如花作嫁衣

偶成

大海浮沈一粟輕誰從頑石證三生術工點鐵仙求富  
錄著傳燈佛好名萬里鷗鵬能變化兩軍蠻觸亦紛爭  
眼前至理參難透齊物蒙莊論最平

香雪齋詩鈔

卷二

九

題徐曉芙大令鏡清避亂詩後

不堪重讀浣花篇故里滄桑哭杜鵑墮齒險遭焦遂馬  
潛身幸脫庾冰船憂深家國天難問詩寫流離世易傳  
一串牟尼三尺几莫拋文字學枯禪君近學佛  
不作詩

自悔書生作計粗窮途金盡賸陰符離家踪跡同漂瓦  
得食生涯逐盪竿安得萬間開厦屋只餘一舸載妻孥  
海陵他日徵流寓可許嚴徐合傳無

射州道中

繞門溪水碧粼粼楊柳經霜綠尚勻一曲琵琶彈暮雨  
不知門外有勞人



酬何子卿睦尹

嘉福

招飲賞菊之作

草堂燈火夜圍圍為洗征塵話舊歡美酒合邊名士飲

謂徐鏡湖趙子憲兩君王少懷參軍孫小舫貳尹

好花偏在異鄉看五湖有約

難歸隱三徑無賞且借官不待梅開東閣裏一篇秋興  
壓吟壇

靖江客感用徐鏡湖

鳴時韻

茫茫百感逐秋來一夕新霜萬葉摧回首風塵猶橐筆  
放懷今古一停杯茂陵尚卧相如病楚國空傳宋玉哀  
已近重陽詩未就荒城煙雨獨登臺

長天鴻雁斷鄉音澤國秋寒一倍深松菊徑邊高士夢

香雪齋詩鈔

卷二

二

椒蘭江上美人心東歸久已輕遼豕南向曾聞戀越禽  
昏夜不知何處笛聲聲吹作水龍吟

沙田萬頃接雲黃滾滾潮聲入混茫卅里平洲遺馬蹟

靖江名馬馱沙又名馬洲江口盡長沙田

一軍飛渡想龍驤

望對岸江陰賊營皆見

於

今天塹爭江水終古君山對夕陽東海揚塵非舊日麻

姑何事嘆滄桑

寂寞江花耐筆乾懶憑三語去求官

時有勸入賞者

宦情落拓

湘江冷世路崎嶇蜀道難暫乞閒身依木佛妄思凡骨

換金丹

寓社廟道院

故人邀就城西約紫蟹初肥白酒酸

謂子

卿



移家海陵與仙海同寓

江海三年客，吳陵作寓公。  
一巢同命鳥，八口寄居蟲。  
竹窗延月編茅屋，避風桐頭呼共醉。  
多事約鄰翁。

歲暮遣懷

敢任飢驅說倦游，暫營小屋類蝸牛。  
夢中得句醒難解，客裏思家歸又愁。  
耐冷肯拋鸚鵡硯，通財還仗鸕鷀裘。  
家人漫訴清寒况，恐被梅花笑不休。

閒居

略遣新年過閒窗，靜坐宜雨林鷹久立。  
風草蝶頻移曲突，妨簷角殘翎葺井眉。  
不嫌容膝窄，衡泌等棲遲。

香雪齋詩鈔

卷二

三

通州客感

羈旅情懷百不堪，困人天氣近收蠶。  
城無活水知泉貴，地有名山借佛參。  
燕子生涯仍宇下，杏花消息斷江南。  
車螯擔酒東郊路，修禊相邀三月三。

登狼山

石苔翠漬露華濃，不借蒼藤九節筇。  
衆裏獨誇腰腳健，萬花扶上最高峰。

葱蘢佳氣接蓬萊，望海樓高傍日開。  
一白鷺毛天際落，大風吹送午潮來。

木居士享伊蒲供，金地藏聯香火因。  
因多少名山讓僧占。



始知成佛為他人

食單櫻筍及時鮮竹裏行厨餉客便醉倚蒼松看雲起  
下方錯認是神仙

山下駱賓王墓

詞客靈猶在荒墳鬱暮煙江淮飛檄日湖海棄官年述  
可浮屠溷才無宰相憐五言誇絕唱寂寞帝京篇

鱗魚

入饌誇時物櫻厨佐酒瓶柳穿梅雨活冰裏海風腥多  
骨憎詞客鮮鱗冠食經千錢曾一尾鄉味憶吳鮓

吾鄉五月

始見於市皆自作浦  
來者一尾值千錢

香雪齋詩鈔

卷二

三

一六居士年八十精大六壬數出示所著欲盡授  
其術戲答一首

二五循環天地數欲測窮通覓管輅先生市隱崇川濱  
太乙六壬手重註二十八宿歸掌握不襲京房說飛伏  
穿穴造化窮微茫風雨六丁夜深哭人謂先生純乎技  
我謂先生且休矣君不見易林無似延壽精曼倩自著  
靈棋經織女支機一片石還問市上嚴君平

同鄉金瀛仙太守

安瀾

移寓前街招飲賦呈

巋然一代魯靈光筆札當年出尚方太守風高二千石  
右軍書重十三行壯游曾欲探銀漢

公慙任南河

舊夢時還



到玉堂東馬南孤存幾輩讓人黃閣事平章公已丑入詞林於今

三十六年嘗有句云朝中首相是同年蓋謂倭相國仁

喬木重遷出谷鶯小闌花午酒同傾羹無鱸膾思鄉味  
座有牛心啖後生拔劍空憐才磊落論文未減氣縱橫  
醉餘還乞新篇讀陶令移居定賦成

將之京師陸蓮洲大令東森置酒餞行賦謝

楊柳江城噪暮蟬鞭絲帽影愴離筵贈金公自重高義

入洛我慚非少年歷下烽煙消草莽聞山左一帶於逆已平海濱

雷雨釀梅天歸來何物酬知已或有凌雲賦一篇

倪贊軒觀察寶璜招同季君梅京卿念詒子卿醜

香雪齋詩鈔

卷二

三

尹飲斗姥宮賦此誌別

雲房一樽酒落日手將揮鰈菜故鄉味江湖游子衣南  
來鷓鴣少北嚮雁鴻飛多感贈言意長安花裏歸

仙女廟別故鄉汪洛雅鳴皋朱承甫周吉甫

聖門重文學干祿實堪鄙後世科名尊咕嗶乃謀仕吾  
黨善讀書豈不識斯旨憂患逼人來富貴同一軌粵海  
煽妖氛禍延及桑梓虎口脫餘生嗟嗟二三子漂轉江  
淮間傭書鑽故紙萍水忽相逢慰勉交彼此投筆怯從  
戎入貲覺深恥處困無長策進退皆失恃秋風槐花黃  
金門值大比鯁生縱不才見獵尚心喜得失司彼蒼文



章祇未技一篇陰符經焉能究至理舍此更茫然何術  
決行止鼎鼎百年過白駒不我俟燕臺風沙多聞有悲  
歌士我將從之游共醉長安市僮僕苦催程去去非得  
已一笑送登舟千里月如水

淮城

淮陰城下水落日繫孤蓬雙柳魚莊綠一燈瓜市紅地  
形限吳會人語近齊風漂母祠堂在當年國士窮

舟次清江聞官軍收復金陵志喜

淼淼清江夜泊舟忽傳凱奏過星郵十年罷虎稽天  
討一夕梟鴟靖逆謀月色重開鍾阜樹濤聲已報秣陵

香雪齋詩鈔

卷二

五

秋李唐功業推裴相試看淮西片石留

紅花埠早發

朝日炫林薄驅車蒼翠間草痕青上屋雲氣白沈山澗  
灰驢行性亭空犢卧閒相逢耦耕者高躅想躋攀

羊流店晉羊太傅故里

清談餘子漫交推夙世金環是將才墮淚尚聞遺愛在  
立功不假酖人來南川裘帶神威壯建業樓船偉略開  
料是荆襄烽火息英靈仍護峴山隈

祠為兩圮  
像亦剝落

沂州道中

暮色生墟莽長途一駐車雲收鴉背日風旋馬蹄沙廢



圍牆垂果蕪田蔓引花此鄉兵燹後問訊幾人家

山行

滿耳駝鈴送夕陽馬頭雲氣鬱蒼蒼穿林人語雜雞犬  
卧草石羣如虎羊泉急亂噴晴雪白沙枯陡削斷崖黃  
世途莫道嶮崎甚卻稱平生磊落腸

望岱

東連蓬島望扶桑一氣風雲入混茫歷劫碑無秦歲月  
登封書有漢文章千秋俎豆開宮殿終古神仙誤帝王  
欲待振衣凌絕頂諸天鸞鶴正迴翔

泰山廟古柏

香雪齋詩鈔

卷二

三

物理久則變蜀有松化石我來泰山隈神魂肅古柏柯  
葉僵不存老榦成鐵積幾經劫火攻壁立自千尺瘦骨  
出銅聲靈根蘊膏液其下產肉芝食之壽千百鸞鳳栖  
更高螻蟻穴無隙中宵雷雨興禿龍疑騰擲秦碑與漢  
簡消淪失考覈萬古名山中留此不磨迹尋常棟梁材  
天心肯秘惜

雨泛大明湖

畫舫蕉衫倚薄寒滿湖煙雨碧漫漫荷花半落楊枝瘦  
還向離人帶淚看

擬借僧寮半日閒手拈畫筆學荆關生綃但著無多墨



一角秋城數點山

釣突泉

蒼龍伏土中骨節蘊靈髓鬼斧鑿之開一洩不能止方  
位按三才相去尺有咫高抽玉井蓮倒射銀河水怒蹴  
天馬蹄寒掉海鯨尾泉石本清閒突兀更可喜幻出三  
朶峰轟轟破空起有若蜀魏吳雄圖分鼎峙終歲兵戈  
聲擾攘無時已吾鄉數奇觀月印三潭裏三潭印月為西湖一景

彼從靜境參幻形悟化理此於活潑中飛花聚石齒遙

遙兩西湖

大明湖亦名西湖

喧寂各擅美豈伊地軸翻亦有機

巧使俛仰自忘勞竟與桔槔比虛堂高枕眠洗滌箏琶

香雪齋詩鈔

卷二

三六

耳

歷下亭

一水繞清漣斯亭海右傳蟬聲寒入暝魚氣溼於煙重  
倚西湖權誰開北海筵七橋遺址沒急雨送游船

東阿

香草詞章託美人豆萁吟罷更傷神多才自古遭奇謗  
作賦何嘗為感甄

受禪臺成竟代劉三分事業未全收獨將詞賦傳千古  
此子居然勝仲謀

七夕宿杜家廟有感



一枕清涼夜悄然畫屏殘燭未成眠風塵驛路逢今夕  
瓜果深閨憶昔年密誓尚留金作合香魂盡化月如煙  
綠章乞借銀河鵲填徧人間離恨天丙子歿已二年矣

七月十七日紀事

快馬出荒臯長風鬱怒號征途紅日盡夜客綠林豪魑  
魅逢人喜豺狼當道嗥有衣休問副蓋篋騰緋袍

雨後

雨後長虹跨遠津歸鴉似笑客中身荒亭有井童沽茗  
古廟無門佛送人擾夢鈴聲如警枕隨行車腳是勞薪  
征衫休道縑痕重尚有前途十丈塵

香雪齋詩鈔卷二

七

南海子

萬雉金城外紅牆帶夕陰崇門閉羽騎高樹出珍禽地  
關周靈囿村羅漢上林堯罇施大醕曾聽凱歌音乙卯

五月 文宗顯皇帝命惠親王為奉命大將  
軍從征諸臣均在南海子 勤政殿 賞飯

涇縣洪烈婦詩并序

婦胡氏夫亡絕食七日卒年二十四

古有從夫義獨無殉夫說豈知死志萌堅金不容折男  
兒事君婦事夫綱常萬古無殊趨當生則生當死死采  
薇槁餓西山隅夫不同牢誓不食自盡生平為婦職陵  
陽松柏留英風吾家綽楔將無同先曾伯祖宇昌公力學  
早世曾伯祖母沈



孺人絕粒七日以殉嘉慶間建坊本邑皂林塘

金鰲玉竦橋

繡縠紋開 太液波濯龍門外幾經過綠槐分蔭通馳道紅芰浮香出 銜河 北闕祥光依日近西山爽氣得秋多晚風尚有朝回客翠憶金車響佩珂

擬游仙詩

月府樓臺舊住家黃金閒棊小蝦蟆清高不礙人孤冷愛向秋風看桂花

北斗祥氛接紫微朝天齊著五銖衣人間怪道無鸞鳳都向星官跨下飛

香雪齋詩鈔

卷二

三

玉勅親除秘閣居獨翻清思入元虛黃庭舊註都刪卻要著人間未見書

天花香雨下續紛舞袖輕翻五色雲一闋霓裳新按罷可能傳與玉皇聞

10055





